

四庫全書

史部

欽定四庫全書

史部  
陝西通志卷五十一

詳校官給事中臣李臺

檢討臣德生覆勘

總校官降調編修臣倉聖脉

校對官編修臣盧遂

謄錄監生臣洪策

欽定四庫全書

陝西通志卷五十一

名宦二

節鎮下

王景萊州掖人晉天福初授耀州團練使臨政不尚刻削民有訟必面詰之不至大過即諭而釋去周廣順中鎮鳳翔世宗即位加兼中書令先是秦鳳陷蜀州旁蕃漢戶詣闕請收復世宗命景與向拱率兵出大

散關進討連陷砦柵遂命景為西面行營都部署大破蜀軍建隆二年來朝太祖復以為鳳翔節度西面緣邊都部署四年卒追封岐王謚元靖

宋史本傳

折德宸世居雲中父從阮鎮府州署德宸馬步軍都校廣順間世宗建府州為永安軍以德宸為節度使時從阮鎮邠寧父子俱領節鎮時人榮之顯德中德宸率師攻下河市鎮入朝以其弟德愿權總州事世宗以其素得蕃情厚加賜賚而遣之乾德元年敗太原



軍於城下擒其將楊璘二年卒贈侍中子御勳御卿  
德宸卒御勳權知府州事開寶二年以為永安軍留  
後九年改泰寧軍節度御卿知府州淳化三年凡四  
遷為府州觀察使五年拜永安軍節度使契丹入寇  
大敗之于子河汭其大將韓德威僅以身免歲餘御  
卿被病韓德威謀知之率衆來侵御卿力疾出戰德  
威聞其至不敢進會疾甚其母密遣人召歸御卿曰  
世受國恩邊寇未滅御卿罪也今臨敵棄士卒自便

不可死於軍中乃其分也為白太夫人無念我忠孝

豈能兩全言訖泣下翊日卒上聞悼惜久之贈侍中

以其子惟正為洛苑使知州事

宋史本傳 按府州改設軍府年分宋史

與五代史不同兩存之以傳疑可也

張美字元珪清河人拜定國軍節度縣官市木關中同

州歲出緡錢數十萬以假民長吏十取其一謂之率

分錢歲至數百萬美獨不取未幾他郡有詣闕訴長

吏受率分錢者皆命償之

宋史本傳

趙贊字元輔幽州薊人宋初鎮延州受密旨許便宜行事將及州境乃前後分置步騎綿綿不絕林莽之際遠見旌旗所部羌渾來迎無不懾服開寶四年改鎮

鄜州卒贊御衆有方畧吏民畏服

宋史本傳

王顯字德明開封人淳化三年知永興軍徙延州時夏臺寇擾顯上疏謂宜謹屯戍固城壘積芻糧然後遴選才勇付以邊任則禦備有素時制沿邊糧斛不許過河西河西青鹽不得過界販鬻犯者不以多少處

斬顯請犯多者依法自餘別為科斷以差其罪

宋史本傳

按宋史地理志京兆府本永興軍節度知軍舊領永興軍路安撫使延安府本彰武軍節度知軍舊領

廊延路經畧安撫使故並入節鎮

張齊賢曹州冤句人字師亮知永興軍時閤門祇候趙

贊以言事得幸提點關中芻糧所為多豪橫齊賢論

列其罪卒抵於法

宋史本傳

田重進幽州人淳化五年知延州重進以武勇知名而

在鎮專務以仁厚及人不令擾百姓

舊志

張詠濮州鄆城人鎮永興有父老訴牛舌為人所割詠詰之爾於鄰忤誰氏最隙訴者曰有甲氏嘗貸粟於某家不遂構怨之深詠遽遣去戒云至家徑解其牛貨之父老如教翌日有百姓訴殺牛者詠謂之曰爾割某氏牛舌以償貸粟之怨而反致訟耶其人遂伏

罪

春明退朝錄

陳若拙字敏之幽州盧龍人知永興軍府時隣郡歲饑前政拒其市糴若拙至則許貿易民賴以濟又移知

鳳翔府

宋史陳思讓傳

孫全照字繼明

莫州清苑人

為廊延路都巡檢使淳化五年

率兵與李繼隆克綏州因與張崇貴等同戍守之俄

護屯兵於夏州兼知州事遷延州監軍兼阿都闐盧

闐路都巡檢事咸平五年將城綏州以為綏州路鈐

轄既調兵夫二萬餘全照言其非便乃罷景德三年

為邠寧環慶都部署趙德明納款朝議減西鄙戍兵

令屯近地因徙全照知永興軍府

宋史孫行友傳

孫僅字隣

幾

蔡州汝陽人

咸平元年進士同知審官院永興孫全照

求代真宗思擇循良宰相言僅嘗倅京府諳民政乃

命知永興軍府僅純厚長者為政頗寬祥符元年加

比部員外郎代還

孫何傳

馬知節字子元

幽州薊人

咸平時徙知延州兼鄜延駐泊部

署邊寇將至方上元節遽命張燈啟關累夕晏樂寇

不測即引去

宋史馬全義傳

向敏中字常之開封人太平興國五年進士明辯有畧

遇事敏速凡二邊道路斥堠走集之所莫不周知咸  
平四年知永興軍景德初命為鄜延路緣邊安撫使  
俄還京兆真宗幸澶淵賜敏中密詔盡付西鄙許便  
宜從事敏中視政如常日會大讎有告禁卒欲倚讎  
為亂者敏中密使麾兵被甲伏廡下明日盡召賓僚  
兵官置酒命讎入至堦伏出盡擒之果各懷短刃即  
席斬焉邊蕃遂安時舊相出鎮不以軍事為意帝聞  
之曰大臣出臨四方惟敏中盡心於民事二年又以



敏中為鄜延路都部署兼知延州委以經畧

宋史本傳

李迪字復古其先趙郡人徙家濮深厚有器局舉進士第一

擢廝羅叛帝憂闕中召對長春殿進集賢院學

士知永興軍城中多無賴子弟喜犯法迪奏取其甚

者部送闕下徙陝西都轉運使

宋史本傳

王嗣宗字希阮汾州人大中祥符間知邠州兼邠寧環慶路都部署城東靈應公廟傍有山穴羣狐處焉妖巫挾之為人禍福民甚信向水旱疾疫悉禱之民語

為之諱狐音前此長吏皆先謁廟然後視事嗣宗毀

其廟燬其穴得數十狐盡殺之淫祀遂息

宋史本傳

周起字萬卿淄州鄒平人知永興軍有風烈數賜書褒

諭

宋史本傳

陳堯咨字嘉謨

閬中人

知永興軍長安地斥鹵無甘泉堯

咨疏龍首渠注城中利之

宋史本傳

李諮字仲詢新喻人知永興軍衣冠子弟恃蔭無賴者

諮悉杖之境內肅然

宋史本傳

李若谷字子淵徐州豐人以右諫議大夫知延州州有  
東西兩城夾河秋夏水溢岸輒圯役費不可勝紀若  
谷乃制石版為岸押以巨木後雖暴水不復壞官倉  
依山而貯穀少若谷使作露囤囤可貯二萬斛他郡  
多取法焉若谷治民多智慮愷悌愛人其去多見思  
宋史本傳若谷知延州夏人遣使來前守多延之堂上若  
谷獨廡下飲食之

隆平集

高良夫判延州撫恤軍民時稱能吏仁宗降敕褒之

賈志

杜衍字世昌越州山陰人擢進士甲科知乾州陳堯咨  
安撫陝西以衍賢徙權知鳳翔府及罷歸二州民邀  
留境上曰何奪我賢太守也遷知永興軍民有晝亡  
其婦者為設方畧立捕得殺人賊發所瘞屍并得賊  
殺他人婦屍二秦人大驚寶元二年復知永興軍時  
方用兵民苦調發吏因緣為姦衍區處計畫量道里  
遠近寬其期會使民得次第輸官比他州費省錢過

半

宋史  
本傳

鄭戢字天休蘇州吳縣人舉進士知永興軍建言凡行軍所須願下有司相緩急析為二等非急罷去先是衙吏輸木京師浮渭泛河多漂沒既至則斥不中程往往破家不能償戢秦歲減二十餘萬又奏罷括糴以勸民積粟長安故都多豪惡戢治之尚嚴人皆惕息未幾為陝西四路都總管兼經畧安撫招討使

宋史

本傳

范雍字伯純河南人中進士第歷陝西都轉運使改知

永興軍歲饑疫雍為賑恤元昊反拜振武軍節度使  
知延州因言延州最當賊衝地濶而砦柵疎近者百  
里遠者二百里土兵寡弱又無宿將為用請益師不  
報元昊引兵數萬至城下雍堅守城得不陷遷知永  
興軍兼轉運司事初完永興城或言其非便詔止其  
役雍匿詔而趣成之明年賊犯定川邠岐之間皆恐  
而永興獨不憂

宋史  
本傳

龐籍字醇之單州武城人及進士第元昊反為陝西體

量安撫使除陝西都轉運使文彥博鞫黃德和獄未  
上詔籍同案籍言德和退怯當誅劉平力戰而沒宜  
加恤其子孫進龍圖閣直學士知延州俄兼鄜延都  
總管經畧安撫緣邊招討使明年改延州觀察使力  
辭換左諫議大夫自元昊陷金明承平塞門安遠栲  
栳砦破五龍川邊民焚掠殆盡籍至稍葺治之戍兵  
十萬無壁壘皆散處城中畏籍莫敢犯法金明西北  
有渾州川土沃衍川尾曰橋子谷寇出入之隘道使

部將狄青將萬餘人築招安砦於谷旁數募民耕種  
收粟以贍軍悉復所亡地築十一城及開乂名平戎  
道通永和烏仁關更東西陣法為方陣頗損益兵械  
元昊既臣召為樞密副使籍曉律令長於吏事治民  
頗有惠愛

宋史本傳

籍在延州軍行出塞使因糧於敵馬

芻皆自刈之還畀其直民無飛輓之勞及去民遮道

而泣曰公用兵數年未嘗以一事煩民雖以一子為

香祝之猶不足報也

宋名臣言行錄



韓琦字稚圭相州安陽人舉進士第二趙元昊反琦論  
西師形勢甚悉即命為陝西安撫使進樞密直學士  
副夏竦為經畧安撫招討使琦畫攻守二策入奏仁  
宗欲用攻策執政者難之琦言元昊雖傾國入寇不  
過四五萬人吾逐路重兵自守勢分力弱遇敵輒不  
支若併出一道鼓行而前乘賊驕惰破之必矣乃詔  
鄜延涇原同出征既還營元昊來求盟琦曰無約而  
和者謀也命諸將戒嚴敵果犯山外琦悉兵付大將

任福令自懷遠城趣德勝砦出敵後如未可戰即據險置伏要其歸及行戒之至再又移檄申約苟違節度雖有功亦斬福竟為敵誘沒於好水川竦使人收散兵得琦檄於福衣帶間言罪不在琦琦亦上章自劾獨奪官知秦州慶歷二年為陝西四路經畧安撫招討使屯涇州琦與仲淹在兵間久名重一時人心歸之朝廷倚以為重故天下稱為韓范東兵從宿衛來不習勞苦琦奏增土兵以代戍建德順軍以蔽蕭

關鳴沙之道方謀取橫山規河南而元昊稱臣召為  
樞密副使元昊邀索無厭琦陳其不便條所宜先行  
者七事又陳救弊八事帝悉嘉納遂宣撫陝西討平  
羣盜張海郭邈山禁卒羸老者汰之盡修廊延城障  
須敵悉歸所侵地乃許和歸陳西北四策以為當今  
以和好為權宜戰守為實務

宋史本傳

公駐延安忽有人

夜攜匕首至卧門遽褰幃帳公起坐問曰誰何曰來  
殺諫議又問曰誰遣汝來曰張相公遣某來蓋是時

張元夏國正用事也公復就枕曰汝攜予首去其人  
曰某不忍願得金帶足矣遂取帶而去明日亦不治  
此事俄有守陴卒報城櫓上得金帶者納之時范純  
祐亦在延安謂公曰不治此事為得體蓋行之則沮  
國威今乃受其帶是墮賊計中矣公歎曰非琦所及  
史塵

范仲淹字希文蘇州吳縣人舉進士第元昊反知永興  
軍改陝西都轉運使會夏竦為陝西經畧安撫招討

使進仲淹龍圖閣直學士以副之延州諸砦多失守  
仲淹自請行遷戶部郎中兼知延州先是詔分邊兵  
總管領萬人鈐轄領五千人都監領三千人寇至禦  
之則官卑者先出仲淹曰將不擇人以官為先後取  
敗之道也於是大閱州兵得萬八千人分為六各將  
三千人分部教之量賊衆寡使更出禦賊時塞門承  
平諸砦既廢用种世衡策城青澗以據賊衝大興營  
田且聽民得互市以通有無又以民遠輸勞苦請建

鄜城為軍以河中同華戶稅租就輸之春夏徙兵就食省糴十之三明年詔諸路入討仲淹曰正月塞外大寒我師暴露不如俟春深入賊馬瘦人饑勢易制也鄜延密邇靈夏西羌必由之地第按兵觀釁臣稍以恩信招來之若不效當舉兵先取綏宥據要害屯兵營田為持久計則茶山橫山之民必挈族來歸矣帝皆用其議仲淹又請修承平永平等砦稍招還流亡定堡障通斥堠城十二砦於是羌漢之民相踵歸

業元昊答書不遜仲淹對來使焚之降知耀州進參  
知政事會邊陲有警與富弼請行邊於是以仲淹為  
河東陝西宣撫使麟州新羅大寇言者多請棄之仲  
淹為修故砦招還流亡三千餘戶蠲其稅罷權酤予  
民又奏免府州商稅河外遂安仲淹為政尚忠厚所  
至有恩邠州民皆畫像生祠事之

宋史本傳

仲淹領延安

閱兵選將日夕訓練又請戒諸路養兵蓄銳毋得輕  
動夏人聞之相戒曰無以延州為意今小范老子腹

中自有數萬甲兵不比大范老子可欺也

名臣傳仲淹

帥邠延威德著聞夷夏聳服熟戶蕃部率稱為龍圖

老子至元昊亦以此稱之

燕談

張亢字公壽宋人天禧三年甲科寶元初元昊反關內

大震充鄜延路鈐轄兼知鄜州未幾改充本路都鈐

轄駐延州慶厯元年秋賊入破麟府間諸堡寨圍府

州事聞命亢為并代都鈐轄專管勾鄜府軍馬公事

亢馳至府城城中不敢啟關亢入即大啟諸所塞門



縱民出入視禁旅尚數千人皆無鬪志乃募執役下  
軍之敢戰者得數百人使擊賊至暮爭持賊首以獻  
亢躬自犒獎取錦袍以衣之連數日皆獲賊如前賞  
於是禁旅悉慚奮擊賊大破之軍始復振乃修復賊  
所破諸堡寨有寧遠寨者据麟府之中最號險要賊  
出兵爭之亢命虎翼軍執萬勝軍旗幟為陣以挑賊  
賊素知萬勝軍罷軟果犯之虎翼軍萬弩齊發短兵  
繼前又遣驍將出賊後夾攻之賊奔潰自此不敢復

出不踰月而五寨立二州始通復奏曰今五寨所通  
麟府往來之一徑耳若更增并邊諸柵以相維衛則  
河外安矣議未下契丹渝盟河朔大警朝廷使為瀛  
帥居數月夏人與契丹有隙大戰黃河外范文正公  
被詔宣撫特還亢并代路副都總管兼沿邊安撫事  
范公至河外親按形勢利害乃奏用亢前議仍以亢  
總其事詔可之凡建寨十四於是蕃漢歸者數千戶  
歲減戍兵萬人省轉輸萬萬計久之徙官卒上思其

勞優贈以官麟府蕃漢民皆繪像祀之

安陽集

薛儀判

鄜州張亢惠州城大而處勢卑難以待敵欲遷就伏  
龜山計功數十萬時虜乘勝深入州無役兵欲以戰  
士築之衆咸以為難儀獨以為可亢喜曰薛君謂之  
可事無不成矣役始興而亢病失音儀外備寇敵內  
董役事人不知張亢之病也城成民至今賴之

溫公集

程琳字天球博野人知永興軍判延州為陝西安撫使  
元昊死諒祚立方幼三大將分治其國議者謂可因

此時以節度使啖三將使各有所部分以弱其勢琳  
曰韋人之喪非所以柔遠人不如因而撫之既而遣  
使冊命夏人方圍慶陽琳曰此可緩慶陽之難矣具  
禮幣賜予之數移報之果喜即日迎冊使慶陽圍亦  
解夏人以五百戶驅牛羊扣邊請降言契丹兵至衙  
頭國中亂願自歸琳曰彼詐也拒不受已而賊果以  
騎三萬臨境上以捕降者為辭琳諜知之閉壁倒旗  
戒諸將勿戰賊疑有備遂引去

宋史  
本傳

夏安期字清鄉

竦子江州德安人

元昊納款罷兵命往陝議邊

費奏省吏員汰兵五萬人擢陝西都轉運使徙知延

州州東北阻山無城郭虜嘗乘之安期至即大築城

時方暑躬自督役不踰月而就元昊請畫疆界朝廷

遣使以問安期安期對曰此不足煩王人衙校可辦

也議遂決

宋史夏竦傳

文彥博字寬夫汾州介休人及進士第

宋史本傳

至和中知

永興軍起居舍人母湜鄆人也上言乞廢陝西鐵錢

朝廷雖不從其鄉人多知之爭以鐵錢買物賣者不肯受長安為之閉肆寮屬請禁之彥博曰如此是愈使惑擾也乃召絲絹行人出其家縑數百匹使賣之日納其直盡以鐵錢於是衆知鐵錢不廢市肆復安

馮志

曹穎叔字秀之亳州譙人初名熙進士及第提點陝西路刑獄知鳳翔府累遷陝西都轉運使自慶歷鑄大錢行陝西民盜鑄不已三司上榷鐵之議穎叔曰鐵

錢輕而貨重不可久行況官自權鐵乎請罷鑄諸郡鐵錢以三鐵錢當銅錢之一從之進知永興軍卒於

官

宋史  
本傳

程戡字勝之許州陽翟人寶元初擢陝西都轉運使進拜廊延路經畧安撫使判延州州夾河為城雉堞頗卑小敵上九州臺則下瞰城中戡調兵夫大增築之

宋史  
本傳

戡在延州橫山豪長請以兵乘塞而自以其屬

取靈夏歸中國戡奏言諒祚數悖慢而多殺戮人人

離心今其豪長如此可許之時大臣重事不從戡乂

在帥閫號習邊事

隆平集

陳堯佐字希元閬州閬中人進士及第以試秘書省校書郎知朝邑縣會其兄堯叟使陝西發中人方保吉罪保吉怨之誣堯佐以事降本縣主簿徙下邳累遷知永興軍徙同州復徙永興軍初太后遣宦者起浮屠京兆城中前守姜遵盡毀古碑碣充塲甃用堯佐奏曰唐賢人墓石今十七七八矣子孫深刻大書欲



傳之千載迺一旦與瓦礫等誠可惜也其未毀者願

勅州縣完護之

宋史本傳

葉清臣字道卿蘇州長洲人知永興軍浚三白渠溉田

踰六千頃

宋史本傳

劉敞字原父臨江新喻人知永興軍大姓范偉為奸利

冒同姓戶籍五十年持府縣短長數犯法敞窮治其

事偉伏罪長安中謹喜

宋史本傳

薛奎字宿藝絳州正平人舉進士第一為陝西轉運使

趙德明言延州蕃落侵其地黑林平下詔按驗奎閱  
郡籍德明嘗假道黑林平移文錄示之德明遂伏改  
戶部郎中知延州趙元昊每遣使至京師請奉予吏  
因市禁物隱關算為姦利奎廉得狀請留蜀道縑帛  
於關中轉致給之

宋史  
本傳

郭達字仲通其先自邢徙洛治平二年出領陝西宣撫  
使神宗即位徙鎮鄜延种諤受嵬名山降取綏州夏  
人遂殺楊定朝論以邊釁方起欲棄綏達曰虜既殺

王官而又棄綏不守見弱已甚且名山舉族來歸當  
何以處既而夏人欲以塞門安遠二砦來易朝廷許  
之達曰此正商於六百里之策也非先交二砦不可  
與乃寢其請夏人又求以亡命景詢易名山達曰詢  
庸人也何所輕重受之則名山不得不還自是蕃人  
無復敢向化矣達詢得殺楊定者姓名謀告將斬之  
於境以謝罪達曰是且梟死囚以給我報曰必執李  
崇貴韓道喜來夏人言殺之矣達命以二人狀貌物

色詰問敵情得乃執獻之神宗嘗訪八陣遺法逵為  
帝論其詳在延安時使以教兵久不就逵擇諸校習  
金鼓屯營者六十四人使人教一隊頃刻而成尤善  
用偏裨每至所部令人自言所能暇日閱按之故臨  
陣者皆盡其技

宋史  
本傳

沈括字存中錢塘人以龍圖閣待制出知延州至鎮悉  
以別賜錢為酒命廛市良家子馳射角勝有軼羣之  
能者自起酌酒以勞之邊人歡激越歲得徹札超乘

者千餘皆補中軍義從威聲雄他府朝廷出宿衛師  
來戍賞賚至再不及鎮兵括以為衛兵雖重而無歲  
不戰者鎮兵也不均且召亂乃藏敕書而矯制賜緡  
錢數萬以驛聞詔報之曰此右府頒行之失非卿察  
事機必擾軍政自是事不暇請者皆得專之种諤師  
次五原糧餉不繼殿直劉歸仁率衆南奔居民怖駭  
括出東郊問曰副都管遣汝歸取糧主者為何人曰  
在後即諭令各歸屯未旬日潰卒盡還括出按兵歸

仁至括曰汝歸取糧何以不持軍符歸仁不能對斬

以徇

宋史本傳

孫永字曼叔趙人擢進士第神宗即位擢天章閣待制  
安撫陝西民景詢外叛詔捕送其孥勿以赦原永言  
陛下新御極曠澤流行惡逆者猶得虧除今緣坐者  
弗宥非所以示信也歷陝西都轉運使時邊用不足  
以解鹽市馬別為一司外臺不得與永奏曰鹽馬國  
之大計使主者專其柄既無統隸苟為非法孰從而

制之加龍圖閣直學士

宋史本傳

司馬光字君實夏縣人寶元初中進士甲科神宗初以  
端明殿學士知永興軍宣撫使下令分義勇戍邊選  
諸軍驍勇士募市井惡少年為奇兵調民造乾糲悉  
修城池樓櫓闕輔騷然光極言公私困敝不可舉事  
京兆一路皆內郡繕治非急宣撫之令皆未敢從若  
乏軍興臣當任其責於是一路獨得免

宋史本傳

趙高字公才邛州依政人第進士郭逵宣撫陝西辟掌

機宜文字种諤擅納綏州降人數萬朝廷以其生事  
議誅諤反故地歸降人以解仇釋兵又徙達帥廊延  
高移書執政請存綏州以張兵勢先規度大理河川  
建堡寨畫稼穡之地三十里以處降者若棄綏不守  
則無以安新附之衆朝廷從之活降人數萬熙寧初  
夏人誘殺知保安軍楊定等既而請和朝廷欲因使  
納塞門安遠二砦而還綏州高言綏實形勢之地宜  
存綏以觀其變計之得也神宗然之遷提點陝西刑



獄韓絳宣撫陝西河東兵西討高言大兵過山界皆  
砂磧乏水草又無險隘可以控扼今若乘兵威招誘  
山界人戶當先經畫山界控扼之地然後招降不爾  
勞師遠攻未見其利絳納种諤之策遂城囉兀以高  
權宣撫判官加知延州夏自失綏意未能已高揣知  
其情奏言夏使請和必欲畫綏界願聽本路經畧司  
分畫明年遂用高策以綏為綏德城初鄜延地皆荒  
瘠占田者不出租賦倚為蕃蔽寶元用兵後凋耗殆

盡其曠土為諸豪所有高因聽自募丁家使占田充  
兵諸豪感服歸募悉補亡籍又檢括境內公私閒田  
得七千五百餘頃募騎兵萬七千高以異時蕃兵提  
空簿漫不可考因議湮其手屬歲饑高分蕃兵願刺  
手者貸常平穀一斛於是人人願刺因訓練以時精  
銳過於正兵神宗聞而嘉之復帥延安元祐初梁乙  
埋數擾邊高知夏將入侵檄西路將劉安李儀以輕  
兵襲洪州夏遂入貢既而以重兵壓境諸將亟請益

戍兵為備高徐諭之曰第謹斥堠無為寇先因遣人

詰夏夏兵遂去

宋史  
本傳

呂公綽神宗時知永興軍待僚屬謙恭遇吏民仁厚

雍大

記

种諤字子正延帥陸誵薦知青澗城夏將嵬名山部落  
在故綏州其弟夷山先降諤使人因夷山以誘之賂  
以金盃名山小吏李文喜受而許降名山未知也諤  
悉起所部兵長驅而前圍其帳名山驚援槍欲鬪夷

山呼曰兄已約降何為如是文喜因出所受金盃示之名山投槍哭遂舉衆從諤而南得豪領三百戶萬五千兵萬人遂城綏州韓絳宣撫陝西用為鄜延鈐轄徙鄜延副總管上言夏主秉常為其母所囚可急擣其巢穴帝以為經畧安撫副使諸將悉聽節制諤率本路并畿內七將兵攻米脂未下夏兵八萬來援諤禦之無定川伏兵發斷其首尾大破之降守將令介訛遇捷聞帝大喜遣中使諭獎後知延州卒諤善

馭士卒臨敵出奇敵畏其敢戰故數有功

宋史种世衡傳

曾公亮字明仲泉州晉江人舉進士甲科熙寧三年拜  
司空明年判永興軍先是慶卒叛既伏誅而餘黨越  
佚自陝以西皆警備閱義勇益邊兵移內地租賦人  
情騷然公亮一鎮以靜次第奏罷之專務裁抑冗費  
長安豪喜造飛語言營卒怨減削謀以上元夜結  
外兵為亂邦人大恐或勸毋出游公亮不為動張燈  
縱觀與賓佐竟夕乃歸居一歲還京師

宋史本傳

吳中復字仲庶興國永興人進士及第歷永興軍河北  
行青苗法使者至將先下州縣中復檄之曰歛散自  
有期今先事擾之何也拒不聽且以報安撫司韓琦  
疏諫青苗錄其語以上關內大旱民多流亡中復請  
加賑恤執政惡之遣使往視謂為不實削一階提舉

玉隆觀

宋史  
本傳

王舉元正定人進士知永興軍夏人屯境上長安從事  
來會兵涇原戒勿輕舉大將賈舜卿銳意請行不聽

舉元曰不過三日敵去矣至期果去神宗以細劉諮  
攻守策舉元請省官減戍益備去兵勿營亭障輿論  
不合遂引疾求解徙陳州未行而卒

歲輔志

范純粹

仲淹子

字德孺元豐中為陝西轉運判官時五路

出師伐西夏高遵裕以劉昌祚後期欲按誅之昌祚  
憂患卧病其麾下皆憤焉純粹恐兩軍不協致生他  
變勸遵裕往問昌祚疾其難遂解神宗責諸將無功  
謀欲再舉純粹奏關陝事力單竭公私大困若復加

騷動根本可憂異時言者必職臣是咎臣寧受盡言之罪於今日神宗納之

宋史范仲淹傳

純粹守延安嘗大閱

百姓入教塲觀者皆集俄而騎出兩翼圍之命觀者皆列坐五人結一保已而有十許人皆無保呼使前問故叩頭曰夏國之人也復問曰爾國使爾來覘我乎曰然因令坐帳前而後閱試技藝迨暮而畢復呼問之曰吾之兵不亦精乎曰然曰歸語爾主吾在此有以相待欲為寇者幸早來飲食而遣之世言文公



三子各得其父一體蓋長子忠宣得其德量中子右丞純禮彞叟得其文學德孺得其將畧也邊人至今

畏服焉

却掃編

賈逵藁城人隸拱聖為卒遷秦鳳路鈐轄徙并代路專主管麟府軍馬熟戶散處邊關苦於寇畧逵差度遠近聚為二十七堡次第相望自是害息畫鐵為的激種豪使射皆成勁兵一夕烽火屢發左右白當起逵卧不應旦而謂人曰此必妄也脫有警可夜出乎徐

問之果邊人燭遺物也復徙秦鳳遷馬軍副都指揮  
使總廊延兵延州舊有夾河兩城始元昊入寇據險  
城幾不能守遠相伏龍山九州臺之間可容窺覘請  
於其地築堡障與城相望延人以為便

宋史  
本傳

李清臣字邦直魏人中皇祐五年進士第元祐初知永  
興軍兼永興軍路安撫使治尚夷易不務奇聲近效  
而民亦不敢犯雍人為之立祠

雞肋  
集

錢即字中道吳越王諸孫第進士辟廊延幕府崇寧中

為陝西轉運判官王師復銀州轉餉最徽宗召對願  
敕邊臣先為不可勝以待釁瀚海地皆屬國得之無  
所用帝然之除知延安府童貫宣撫陝西時長安百  
物踴貴錢幣益輕貫欲力平之計司承望風旨取市  
價率減什四違者重置於法民至罷市又行均糴法  
賤入民粟而高金帛估以償下至募兵射士之有田  
者咸被抑配關內騷然即屢抗章極陳其害貶永州  
團練副使然糴害亦寢

宋史錢  
惟演傳

陶節夫字子禮鄱陽人第進士崇寧初遷陝西轉運副使徙知延安府招降羌有功築石堡等四城石堡以天澗為隍可趨者惟一路夏人害粟其間以千數既為宋有其帥驚曰漢家取我金窟塢亟發鐵騎來爭節夫分部將士遮禦之斬獲統軍以下數十百人擢顯謨閣待制龍圖閣直學士方議城銀州謀告夏人已東節夫料必西趨涇原遣裨將耿端彥疾驅至銀州五日城成夏人果從涇原至則城備已固遂遁去

進樞密直學士歷知永興軍卒

宋史本傳

夏炎字長卿真定獲鹿人政和中知永興初陝西行鐵錢幣益輕蔡京設法盡歛之更鑄夾錫錢幣稍重京去相轉運使李諲陳敦復見所歛已多遽請罷鑄鐵錢既復行其輕如初自關以西皆罷市民不聊生炎獨一切弛禁聽從其便

宋史賈昌朝傳

劉法郎延帥有材畧時論名將必以法為首後沒於兵

士大夫惜之

馬志

孔平仲臨江新喻人字義甫登進士第徽宗立提舉陝

西路刑獄帥鄜延

宋史本傳

徽宗時自陝西轉運使徙知

延安府以經術飾吏事待羗人以威信甚有治狀

舊志

唐重字聖任眉州彭山人大觀三年進士知同州金人

已陷晉絳將及同重度不能守乃縱州人使出自以

殘兵數百守城以示必死金人疑有備不復渡河詔

擢天章閣待制高宗即位以天章閣直學士知京兆

府尋兼京兆府路經畧制置使重前在同州凡三上

疏大元帥府乞早臨關中以符衆望暨至永興又六  
上疏皆以車駕幸關中為請并條奏關中防河事宜  
大意謂號陝殘破解州河中已陷同華州沿河邊面  
亘六百餘里本路無可戰之兵乞增五路兵馬十萬  
以上委漕臣儲侍以守關中章凡七八上復上疏乞  
選宗親賢明者充京兆牧或置元帥府令總管秦蜀  
十道以便宜從事帥守監司並聽節制則不惟可以  
衛敵亦可救郡縣瓦解之失不報金將羅索渡河陷

韓城縣時京兆餘兵皆為經置使錢蓋調赴行在金  
兵圍城城中兵不滿千固守踰旬外援不至城陷重  
以親兵百人血戰諸將扶重去重曰死吾職也戰不

已衆潰重中流矢死贈資政殿學士謚恭愍

宋史本傳

楊宗閔代州崞縣人契丹亡將小博囉招合雜羗十餘

萬破豐州攻麟府諸城宗閔領本道兵馬屢摧敗之

俘其父母妻子

宋史楊震傳

為永興路總管與唐重同守

永興金人陷城迎戰死之

宋史楊存中傳



張浚字德遠漢州綿竹人中進士第高宗除浚知樞密院事謂中興當自關陝始慮金人或先入陝取蜀則東南不可保遂慷慨請行詔以浚為川陝宣撫處置使得便宜黜陟抵興元金人已取郿延驍將羅索貝勒引大兵渡渭攻永興諸將莫肯相援浚至即出行關陝訪問風俗罷斥姦賊搜攬豪傑諸將惕息聽命時烏珠在淮西浚懼其復擾東南謀牽制之遂決策治兵合五路之師以復永興金人大恐急調烏珠等

由京西入援大戰於富平涇原帥劉錡身率將士薄敵陣殺獲頗衆會環慶帥趙哲擅離所部望塵驚遁諸軍皆潰浚斬哲以殉退保興州命吳玠聚兵扼和尚原大散關以斷敵來路紹興元年金將烏魯攻和尚原吳玠乘險擊之金人大敗拜浚檢校少保定國軍節度使浚在關陝三年訓新集之兵當方張之敵以劉子羽為上賓趙開為都轉運使吳玠為大將故關陝雖擾而全蜀安堵且以形勢牽制東南江淮亦

賴以安

宋史本傳

盧法原字立之

湖州德清人

紹興元年起川陝等路宣撫處

置副使進宣撫副使金人攻關輔叛將史斌陷興州

諸郡多應法原命諸將堅壁衆以為怯未幾河東經制使王燮以乏食班師法原開關納之與燮同破斌

復興州方巨盜克斥秦隴叛兵窺蜀法原極意拊循

嚴為備禦傳檄諸路人心稍安視山川險阻分地置

將前後屢捷上所倚重卒於軍

宋史盧知原傳

吳玠字晉卿隴千人建炎四年為秦鳳副總管兼知鳳翔府時兵火之餘玠勞來安集民賴以生九月金人驟至玠軍大潰收散軍保和尚原積粟繕兵列柵為死守計鳳翔民感其遺惠夜輸芻粟助之玠償以銀帛民益喜輸者數年紹興元年金將烏魯哲庫出散關和尚原玠命諸將更戰金人大敗沒立攻箭箬關玠復擊退之居母喪起復兼陝西諸路都統制金烏珠會諸道兵十餘萬攻和尚原玠以奇兵絕其糧道

設伏於神全縱兵夜擊大敗之三年薩里罕入興元  
未幾北歸玠遣兵邀於武休關掩擊其後軍墮澗死  
者以千計盡棄輜重去四年敵大入攻僊人關玠敗  
之授川陝宣撫副使四月復秦鳳隴三州玠與敵對  
壘且十年常苦遠餉勞民屢汰冗員節浮費益治屯  
田歲收至十萬斛又調戍兵命梁洋守將治褒城廢  
堰民知灌漑可恃願歸業者數萬家九年卒於僊人

關贈少師謚武安

宋史本傳

劉子羽字彥修崇安人張浚宣撫川陝辟子羽參議軍  
事富平戰不利浚移治閬州子羽請獨留河池調護  
諸將以通內外聲援許之明年吳玠以秦鳳經畧使  
戍河池王彥以金均房鎮撫使戍金州二鎮皆飢興  
元帥臣閉糴二鎮病之彥玠皆願得子羽守漢中浚  
承制拜子羽利州路經畧使兼知興元府子羽至漢  
中通商輸粟二鎮遂安是冬金人犯金州三年王彥  
失守子羽焚興元退守三泉縣西蜀大震子羽遺浚

書言已在此金人必不南先是子羽預徙梁洋之積至是金人深入餽不繼又腹背為子羽玠所攻死傷十五六亟遁去子羽出師掩擊墮溪澗死者不可勝計餘兵不能自拔者悉降浚雖衄師卒全蜀子羽之功居多四年坐富平之役與浚俱罷

宋史本傳  
興元本利州路按

屬府建炎南渡後興元為川陝要衝以知府兼本路經畧安撫使遂領節鎮之任後分利州路為東西路孝宗時以興元帥兼領二路則其任彌重矣至於川陝宣撫雖駐興元此又使相重臣分陝之寄文臣如張浚胡世將武臣如吳玠吳玠非止帥興元一路也

王庶字子尚慶陽人舉進士第高宗即位除廊延經畧使兼知延安府累立戰功進龍圖閣待制節制陝西六路軍馬東京留守宗澤承制以庶權陝西制置使會金人大入庶調兵自沿河至馮翊據險以守金人先已乘冰渡河犯晉寧侵丹州又渡清水河破潼關秦隴皆震庶傳檄諸路會期討賊金人併兵寇廊延庶在坊州聞之夜趨廊延以遏其衝金人詭道陷丹州遂陷延安以失律自劾罷張浚自富平敗歸始思



庶可用乃召之庶至力陳撫秦保蜀之策勸浚收熙  
河秦鳳之兵扼關隴為後圖浚不納紹興五年起復  
知興元府庶以士卒單寡籍興洋諸邑強壯兩丁取  
一三丁取二號義士日閱於縣月閱於州厚犒之不  
半年有兵數萬陞徽猷閣直學士

宋史  
本傳

胡世將字承公常州晉陵人登進士第紹興九年宣撫  
川陝時關陝初復朝廷分軍移屯熙秦鄜延諸道明  
年金人陷同州入長安諸路皆震乃遣大將吳玠田

晟出鳳翔郭浩出奉天不數日璘捷於石壁及扶風  
金人不敢度隴分屯之軍得全師而還十一年朝廷  
復用兵會母喪命起復遂復隴州破岐下諸屯又取  
華虢兵威稍振未幾致仕卒

宋史  
本傳

吳璘字唐卿隴千人紹興元年箭箬關之戰璘功居多  
超遷統制和尚原軍馬及烏珠深入陣分合三十餘  
璘隨機而應金人大敗烏珠中流矢遁十年薩里罕  
入長安趨鳳翔璘隨胡世將在河池遣姚仲拒於石

壁若敗之詔同節制陝西諸路軍馬璘以書遺金將  
約戰金呼紐郎君以三千騎衝璘軍璘擊走之呼紐  
入扶風復攻拔之薩里罕怒甚自戰百通坊列陣二  
十里璘遣姚仲力戰破之授鎮西軍節度使十四年  
朝議析利州路為東西路以璘為西路安撫使時和  
議方堅而璘治軍經武常如敵至二十一年以守邊  
安靜拜少保三十一年兼陝西河東招討使孝宗受  
禪命兼陝西河東路宣撫招討使乾道元年詔仍領

宣撫使改判興元府璘至漢中修復褒城古堰溉田  
數千頃民甚便之子挺字仲烈高宗差利州東路前  
軍同統制璘卒起復金州都統改利州東路總管淳  
熙元年改興州都統軍中自置互市以來羗馬西路  
騎兵遂雄天下四年除知興州利州西路安撫使郡  
東北有二谷水挺作二堤扞之紹熙二年水發挺既  
賑被水者復增築長堤民賴以安

宋史  
本傳

郭浩字充道隴千人建炎二年權主管廊延路經畧安

撫時二敵交侵廊延東皆金人西北即夏境其屬朝廷者惟保安一軍德靜一若浩間道之德靜置司招收散亡與敵對壘一年敵不能犯張浚經畧陝西移知鳳翔府寓治寶雞縣又退保和尚原金人抵原下浩與吳玠隨方捍禦第功遷正任防禦使紹興元年金人破饒風嶺盜梁洋入鳳州攻和尚原浩與吳玠往援斬獲萬計遷邠州觀察使徙知興元府饑民聚米倉山為亂浩討平之徙知金州金州殘弊特甚戶

口無幾浩招輯流亡開營田以其規置頒示諸路他軍以匱急仰給朝廷浩獨積贏錢十萬緡以助戶部朝廷嘉之九年充陝西宣諭使知金州十一年金人內侵浩遣裨將設伏破之十四年分利州為東西路以浩為金房開達州經畧安撫使屯金州仍建帥府十五年卒諡恭毅

宋史本傳

楊政字直夫原州臨涇人建炎間從吳玠擊金人九戰九捷紹興元年金人趨和尚原攻箭箐關政引兵大

破之十月金兵十萬自寶雞列柵至原下吳玠以政  
統領將兵擊之獲萬戶首領三百餘人甲士八百六  
十人二年陞隴州團練使選知鳳州十年徙興元會  
金人渝盟政建迎敵之策兼川陝宣撫副使司都統  
制偕統制楊從義却金人於鳳翔府城南砦敗之獲  
戰馬數百遂帥師趨寶雞渭水上以拒敵衝凡大戰  
七斬獲甚多十一年秋金合軍五萬來攻政引兵夜  
入隴州界趨吳山與金人對壘又敗金萬戶通檢於

竇雞擒之和議成帝召政還軍民諸部使者借留十  
三年還鎮十四年分利州為東西路政屯興元府政  
守漢中十八年六堰久壞失灌溉之利政為修復漢  
江水決為害政築長堤捍之凡利於民者不敢以軍  
旅廢休兵十餘年將士上下安之

宋史  
本傳

虞允文字彬甫隆州仁壽人克川陝宣諭使陞辭言金  
亮既誅新主初立彼國方亂天相我恢復也和則海  
內氣沮戰則海內氣伸上以為然允文至蜀與吳璘



議經畧中原璘進取鳳翔復鞏州金治兵爭陝西新  
復州郡蜀士欲棄之允文持不可孝宗受禪朝議欲  
盡棄陝西允文再上疏言恢復莫先於陝西陝西五  
路新復州郡又係德順之存亡一旦棄之則窺蜀之  
路愈多利害至重前後凡十五疏隆興元年入對言  
今有八可戰以笏畫地陳其利害乾道三年拜四川  
宣撫使金洋興元歸正人二萬遮道訴繫縲之苦允

文分給官田俾咸執業

宋史本傳

晁公武

徐州人

乾道三年知興元府事兼安撫使東吏愛

民百廢具舉庭無滯訟稱為良吏

賈志

劉甲字師文

龍游人

淳熙二年進士程松為四川宣撫使

吳曦副之以甲知興元府利東安撫使曦獻四州於

金金人破大散關甲告急於朝乞下兩宣撫司協力

扞禦松謀遁甲固留不可遽以便宜檄甲兼沿邊制

置曦遣王越趙觀以書致甲甲援大義拒之募二兵

持帛書遣參知政事李壁告變曦僭位甲遂去官安

丙等誅曦詔趣還任除宣撫使金自鵲嶺關劄金崖  
進屯八里山甲分兵進守駐饒風以待之金人知有  
備引去明年罷宣撫司合利東西為一帥治興元進  
知興元府利州路安撫使節制本路屯駐軍馬嘉定  
七年卒於官

宋史  
本傳

金

羅索字幹里延完顏部人太祖使羅索取陝西下同華  
二州克京兆府獲宋制置使傅亮遂克鳳翔丹州破

臨真進克延安府降綏德軍及靜邊懷遠等城寨十六宋安撫使折可求以麟府豐三州及堡寨九降於羅索遂破晉寧軍并降鄜坊二州於是羅索守延安延安鄜坊州皆殘破人民存者無幾羅索置官府輯安之京兆府叛羅索復討平之遂攻乾州州降進克邠州軍於京兆睿宗與張浚戰於富平宗弼左翼軍已却羅索以右翼力戰軍勢復振張浚軍遂敗睿宗曰力疾鏖戰以徇王事遂破巨敵雖古名將何以加

也天會八年薨贈金源郡王謚莊義

金史本傳

盧克忠貴德州鳳集人天德間同知保大軍節度使綏  
德州軍卒數人過鄜城求宿民家是夜有賊剽主人  
財而去有司執假宿之卒繫獄榜掠誣服克忠察其  
冤獨不肯署未幾果得賊假宿之卒遂釋

金史本傳

布薩端本名齊勤中都路和爾和必喇明安人貞祐三  
年以左丞相行省陝西端雖隆老凡朝廷使至必遠  
迎宴勞不懈故讒構不果行初同華舊屯陝西軍皆

隸陝州宣撫副使永錫端奏潼關之西皆陝西地請  
此軍隸行省緩急可使朝廷從之興定四年朝廷以  
知臨洮府事承裔行元帥府於鳳翔端奏隴外十州  
介宋夏之間與諸番雜處今承裔移居鳳翔恐一旦  
有警援應不及乞令承裔行元帥府於鞏州若以鳳  
翔密邇宋界則本路屯兵已多但令總管攝行帥事  
與京兆輩相為首尾足以備緩急矣從之是歲薨贈

延安郡王

金史  
本傳

巴古拉貞祐四年知京兆府事兼本路兵馬都總管興  
定元年授陝西路統軍使兼前職四年權尚書右丞  
左副元帥行尚書省元帥府於京兆時陝西歲運糧  
以助關東民力寢困巴古拉言以舟楫自渭入河順流  
而下庶可少紓民力從之時以為便五年正月朝議  
欲復取會州巴古拉上言計月當費米三萬石草九萬  
稱轉運丁夫十餘萬人今農事將興沿邊常費已不  
暇給豈可更調十萬餘人以餉此軍止宜令承裔軍

護民耕稼俟敵意怠然後取之詔從之三月上言陝西州郡置帥府者九部衆卒不過三四千長校猥多虛糜廩給延安鳳翔邊隅重地固當仍舊德順等處宜皆罷去制可是年西北兵三萬攻延安巴古拉遣元帥完顏哈達元帥納哈邁珠禦之遂保延安元光元年正月罷知河中府事二年正月上諭宰臣曰陝右兵將退當審後圖右丞巴古拉深悉彼中利害其與共議之尋遣往陝西與行省薩布哈達從宜規畫焉

金史



本傳

尼瑪哈富勒呼中都路明安人明昌五年進士貞祐四年為陝州宣撫副使兼西安軍節度使元兵取潼關戍卒皆潰富勒呼禦戰兵敗死焉

金史本傳

內族慶善努名承立字獻甫興定元年以功進保大軍節度使行帥府事於薊州二年五月夏人率步騎三千由薊州入寇慶善努以兵逆之戰於馬吉峰殺百餘人斬酋首二級生擒數十人獲馬三十餘匹三年

四月夏人據通秦寨慶善努遣提控納合邁珠討之  
夏人以步騎二萬逆戰邁珠擊敗之夏人由葭蘆川  
遁去斬首八百級俄而復攻寨據之慶善努率兵與  
戰斬首五千級復其寨詔賜慶善努金帶一將士賞  
賚有差四年四月破夏兵於宥州斬首千餘級圍神  
堆府援兵大至復擊走之

金史  
本傳

完顏額爾克為同州節度使宣宗興定時元兵取同州額爾

克死之

續文獻  
通考

完顏祿錦中都路額特赫格們明安人除保大軍節度使興定五年鄜州破祿錦自投崖下死焉贈特進知

延安府事詔陝西行省訪其子孫以聞

金史本傳

赫舍哩鶴壽河北西路山春猛安人權元帥左都監行元帥府於鄜州興定五年十月鄜州破鶴壽與數騎突出城追及之鶴壽據土山力戰而死謚果勇

金史本傳

鈕祜祿資祿本姓張氏咸平府人興定五年遙授隴安軍節度使俄改金安軍詔曰陝西行省奏軍官闕員

卿久在行陣御下有法舊隸士卒多在京兆今正防  
秋關河要衝悉心備禦將兵救鄜州閏十二月鄜州  
破被執不肯降遂死贈銀青榮祿大夫中京留守元  
光元年言事者謂資祿褒贈尚薄詔錄其二子烈山  
林泉陞職一等陝西行省軍中用之

金史  
本傳

完顏寔本姓李氏中都寶坻人興定五年改定國軍節  
度使兼同知京兆府事元光元年陝西行省博索奏  
京兆南山密邇宋境官民遷避其間者無慮百萬人

可遣官鎮撫庶幾不生他變宣宗以為然十月霆以  
本官為安撫使守同知歸德府惟宏大司農丞郭浩  
為副使分護百姓之遷南山者元光二年卒

金史  
本傳

完顏哈達名瞻字景山興定二年知延安府事兼鄜延  
路兵馬都總管三年夏人犯通秦合達出兵擊之四  
年為元帥右都監屯延安十月夏人攻綏德州哈達  
將兵敗之五年五月知延安府事兼前職十一月夏  
人攻安塞堡哈達夜襲其營夏人大潰元光元年權

參知政事行省事於京兆未幾真拜北兵既破葭州  
哈達率兵復取之正大二年陝西旱甚哈達齋戒請  
雨雨澍是歲大稔民立石頌德延安既殘毀哈達招  
集散亡助其耕墾自是延安之民稍復耕稼之利

金史

本傳

元

石天應字瑞之興中永德人太祖時從穆呼哩征陝右  
攻葭州拔之因說穆呼哩曰此州當金夏之衝居人

健勇倉庫豐實宜命將守之多造舟楫以備不虞穆  
呼哩然之表授陝西河東路行臺兵馬都元帥以勁  
兵五千留守葭蘆遂造舟楫建浮橋先是葭守王公  
佐收合餘燼將圖復故地及見橋成遂潰去於是分  
兵四出悉定葭綏之地

元史  
本傳

田雄字毅英北京人隸穆呼哩麾下從攻廊坊綏葭諸  
州有功太宗時從攻興元又破楨州雷家堡授鎮撫  
陝西總管京兆等路事時關中苦於兵革郡縣蕭然

雄披荊棘立官府開陳禍福招徠四山堡砦之未降者獲其人皆慰遣之由是來附者日衆雄乃教民力

田京兆大治事聞賜金符

元史本傳

廉希憲字善甫博囉哈雅子世祖以京兆分地命希憲為宣撫使京兆控制隴蜀諸王貴藩分布左右民雜羌戎尤號難治希憲講求民病抑強扶弱暇日從名儒若許衡姚樞輩諮訪治道首請用衡提舉京兆學校教育人材為根本計國制為士者無隸奴籍京兆



多豪強廢令不行希憲至悉令著籍為儒有民妻與  
卜者厭詛其夫殺之獄成僚佐皆言方大旱卜者宜  
減死希憲議當伏法已而大雨立應世祖即位併京  
兆四川為一道以希憲為宣撫使劉太平和魯海入  
京兆謀為變希憲至宣布詔旨安諭六盤未幾斷事  
官告瑄塔哈已反約劉太平和魯海同日俱發希憲  
得報遣萬戶劉哈瑪爾等掩捕劉太平和魯海及其黨  
悉置獄會有詔赦至希憲命絞太平等於獄尸於通

衢方出迎詔人心遂安乃遣使自劾帝深善之別賜金虎符使節制諸軍詔以為中書右丞行秦蜀省事

元史  
本傳

楊惟中字彥誠弘州人世祖以太弟得開府專封拜乃奏遷陝右四川宣撫使諸軍帥橫侈病民郭千戶者

尤甚惟中戮之以徇關中肅然

元史  
本傳

賽音迪延齊沙朮斯鼎一名烏瑪喇回回人至元元年置陝西五路行中書省出為平章政事蒞官三年增戶九千

五百六十五軍一萬二千二百五十五鈔三百三十  
一錠屯田糧九萬七千二十一石中書以聞詔賞銀  
五千兩仍命陝西五路大小官屬並聽節制八年命

行省事於興元

元史  
本傳

沙朮斯字得之其先大食國人後家真定至元二年拜陝  
西行臺監察御史即上封事十條皆一時羣臣所不  
敢言者咸里有執政陝西行省者恣為非道沙朮斯發  
其罪而按之輒棄職夜遁有詔勿逮問然猶杖其私

人

元史  
本傳

趙炳字彥明惠州灤陽人至元九年授京兆路總管兼  
府尹皇子安西王開府於秦詔治宮室悉聽炳裁製  
王府吏卒橫暴擾民者卽建白繩以法自是豪猾斂  
戢有旨以解州鹽賦給王府經費歲久積逋二十餘  
萬緡有司追理僅獲三之一民已不堪炳密啟王遽  
命免徵會王北伐詔以京兆一年之賦充軍資炳復  
請曰所徵逋課足佐軍用可貸歲賦以蘇民力令下

秦民大悅

元史本傳

李德輝字仲實通州潞縣人憲宗割京兆隸世祖潛藩  
擇廷臣能理財賦者俾調軍食以德輝為使時汪世  
顯兵數萬仰哺德輝乃募民入粟陸挽輿元水漕嘉  
陵未期年而軍儲充羨至元七年安西王鎮關中奏  
以德輝為輔遂改安西王相至則視瀕涇營牧故地  
可得數千頃起廬舍疏溝澮假牛種田具於貧民二  
千家屯田其中歲得粟麥芻藁萬計

元史本傳

張雄飛字鵬舉琅琊臨沂人遷同知京兆總管府事宗室公主有家奴逃渭南民間為贅壻主適過臨潼識之捕其奴與妻及妻之父母皆械繫之盡沒其家貲雄飛與主爭辯辭色俱厲主不得已以奴妻及妻之父母家貲還之惟挾其奴以去

元史本傳

李呼喇濟一名庭玉隴西人至元十四年授延安路管軍招討使圖魯叛於六盤山呼喇濟以延安路軍會巴爾斯台趙炳及總帥府兵於六盤敗圖魯俘其孥還

授京兆延安鳳翔三路管軍都尉兼屯田守衛事二十三年以老病乞歸元貞二年入覲授陝西等處行

中書省右丞議本省公事卒諡襄敏

元史本傳

許宸字君黼一名和爾果斯

絳州曲沃人

成宗即位遷陝西

行中書省右丞時關中饑議發倉粟賑之同列以未得請於朝不可和爾果斯曰民為邦本今饑餒如此若俟命下無及矣擅發之罪吾當獨任之不以累公等遂大發粟不數日命亦下明年旱禱於終南山而

雨歲以大熟民皆畫像祀之

元史許國楨傳

王利用字國賓通州潞縣人大德二年改安西興元兩路總管其在興元減職田租額站戶之役於他郡者悉除之民甚便焉有婦毒殺其夫問所從來吏教婦指為富商所貨利用曰家富而貨毒藥豈人情乎訊之果寃

元史本傳

田滋字榮甫開封人大德十年拜陝西行省參知政事時陝西不雨三年道過西嶽因禱曰滋奉命來叅省



事而西安不雨者三年民饑而死滋將何歸願神降  
甘澤以福黎庶到官果大雨滋即開倉以麥五千餘  
石給小民無種者俾來歲收成以償官民大悅未幾

以疾卒於位

元史  
本傳

趙世延字子敬居雲中北邊大德十年除安西路總管  
安西故京兆省臺所治號稱會府前政壅滯者三千  
牘世延既至不三月剖決殆盡陝民饑省臺議請於  
朝賑之世延曰救荒如救火願先發廩以賑朝廷設

不允世延當傾家財若身以償省臺從之所活者衆

元史

本傳

王琚字仲瑗濟南鄒平人大德間為縣令與伯顏帖木兒共疏涇渠後遷陝西諸道行御史臺監察御史上

言於豐利渠上更開石渠渠成民賴之

涇陽縣志

阿爾哈雅輝和爾氏集賢大學士圖烈之子至治初出為

平章政事歷陝西省有惠政

元史本傳

滿濟勒噶台

默爾特人

泰定四年拜陝西行臺治書侍御史

關陝大饑賑貸有不及者盡出私財以周貧民所活

甚衆

元史  
本傳

泰曼台穆呼哩五世孫天厯二年遷陝西行省平章政  
事關中大饑詔募民入粟予爵四方富民應命輸粟  
露積關下初河南饑告糴關中關中民過糴至是關  
吏乃河南人修宿怨拒粟使不得入泰曼台杖關吏  
而入其粟時入關粟雖多而貧民乏鈔以糴泰曼台  
取官庫未燬昏鈔得五百萬緡識以省印給民行用

俟官給賑饑鈔如數易之先時民或就食他所多毀  
墻屋以往奈曼台諭之曰明年歲稔爾當復還其勿

毀民由是不敢毀及明年還皆得安堵如初

元史本傳

張養浩字希孟濟南人天歷二年關中大旱饑民相食  
特拜陝西行臺中丞既就道遇餓者則賑之死者則  
葬之道經華山禱雨嶽祠泣拜不能起天忽陰翳一  
雨二日及到官復禱於社壇大雨如注水三尺乃止  
禾黍自生秦人大喜時斗米直十三緡民持鈔出糴

稍昏即不用詣庫換易則豪猾黨蔽易十與五累日  
不可得民大困乃檢庫中未毀昏鈔文可驗者得一  
千八十五萬五千餘緡悉以印記其背又刻十貫五  
貫給散貧乏命米商視印記出糶詣庫驗數以易之  
於是吏弊不敢行到官四月未嘗家居止宿公署夜  
則禱於天晝則出賑饑民終日無少怠每一念至即  
撫膺痛哭遂得疾不起卒年六十六關中之人哀之如失  
父母至順二年贈陝西等處行中書省平章政事謚

文忠

元史  
本傳

多爾濟勒巴字惟中穆呼哩七世孫拜中書平章政事陝  
州危急因出為陝西行臺御史大夫中途聞商州陷  
武關不守即兼程至奉元而賊已至鴻門吏白涓日  
署事不許曰賊勢若此尚何顧陰陽拘忌哉即就署  
督諸軍復商州乃修築奉元城壘募民為兵出庫所  
藏銀為大錢射而中的者賞之由是人皆為精兵金  
商義兵甚精銳列其功以聞賜勅書褒獎之其軍遂

盛而國家獲其用金州由興元鳳翔達奉元道里迴  
遠乃開義谷創置七驛路近以便未幾左遷關中人  
遮道涕泣曰生我者公也何遽去我而不留乎多爾濟  
勒巴慰遣之不聽乃從間道得出

元史  
本傳

王思誠字致道兗州磁陽人中進士第至正十二年為  
陝西行臺治書侍御史十七年春紅巾陷商州奪七  
盤進據藍田縣距奉元一舍思誠會豫王阿喇特納  
實哩及省院官於安西王邸衆洶懼無言思誠曰陝

西重地天下之重輕繫焉察罕特穆爾河南名將賊素畏之宜遣使求援此上策也乃移書察罕特穆爾得書大喜遂提輕兵五千倍道來援思誠犒軍於鳳凰山還定守禦九事夜宿臺中未嘗解衣既而援兵破賊思誠請於朝宜命察罕特穆爾專守關陝詔從之

元史本傳

察罕特穆爾字廷瑞系出北庭家河南為潁州沈丘人至正十六年僉河北行樞密院事十七年賊陷商州



直趨長安至灞上三輔震恐陝西省臺來告急察罕  
特穆爾即領大衆入潼關長驅而前與賊遇戰輒勝  
殺獲以億萬計賊餘黨皆散潰走南山入興元朝廷  
嘉其功授陝西行省左丞未幾賊陷秦隴窺鳳翔察  
罕特穆爾即先分兵入守鳳翔城而遣諜者誘賊圍  
鳳翔賊果來圍之數十重察罕特穆爾自將鐵騎晝  
夜馳二百里往赴北去城里所分軍張左右翼掩擊  
之城  
中軍亦開門鼓譟而出內外合擊斬首數萬級

餘黨遁還關中悉定進陝西行省右丞兼陝西行臺  
侍御史察罕特穆爾益務練兵訓農以平定四方為  
已責拜陝西行省平章政事仍兼同知行樞密院事

便宜行事

元史  
本傳

僧格實哩為陝西行臺御史守官家洞及明大將軍徐  
達遣兵攻之勢窮不屈與妻俱投崖死

賈志

明

常遇春濠之定遠人為左副將軍西渡關下奉元路西

逼鳳翔其平章李思齊率所部十餘萬衆奔臨洮鳳

翔下

世法錄

遇春平奉元鳳翔所至望風歸服不妄殺

一人令將士所過無得搶掠秦人德之為立祠

賈志

馮勝初名國勝更名宗異最後名勝定遠人從大將軍  
北討西趣潼關其將張德欽等來逆戰大敗之遂奪  
潼關守焉復西下華州拜右副將軍詔渡河發陝西  
取鳳翔遂渡隴俄復為右都督再以右副將軍同大  
將軍出西安分兵徇畧陽禽元平章蔡琳遂入沔州

又遣別將絲鳳翔入連雲棧合攻興元克之論功封

宋國公明年出鎮陝西修城隍簡士馬又明年出塞

後還鎮陝西改河南

世法錄

耿炳文濠人

名山藏

洪武初鎮守陝西修築涇陽洪堰又

濬渠十萬三千餘丈

雍大記

沐英字文英定遠人洪武九年鎮關西威望大著

名山藏

郭敦字仲厚山西堂邑人鄉舉累官陝西左叅政端重

有威僚屬敬畏累進戶部尚書鎮守陝西邊陲晏然

其出關僅跨一騾攜老蒼頭自隨

賈志

沈福字應隆石康人永樂乙未進士巡按陝西時有布商被殺投屍塘中不可蹤跡一日福方視事見蛇盤轉昂首若有所訴福曰蛇告我矣令人隨蛇所之果得謀商者置之法人以為神

廣東志

魏源字文淵江西建昌人永樂進士除御史巡按陝西西安大疫奏言諸府倉粟積一千九十餘萬石足支十年今民疫妨農請輸鈔代兩稅之半從之

明史  
藁

陳鑑字有戒吳人永樂十年進士擢副都御史鎮陝西  
得便宜行事寬洪清慎悉民疾苦不作聲色專務安  
輯凡練兵屯田水利鹽法事有經畫薦按察使王文  
副使金濂入內臺正統元年上疏請定輸粟贖罪法  
在陝十餘年教興政理每入朝民必遮道送不忍舍  
比還歡迎父老或走數程久旱鑑至必雨久雨鑑至  
必霽世法錄鑑守陝西正統末以左都御史按行通州  
鑑所至有聲績而關中尤著每行部人有疾病誓得

為鎰一昇肩輿輒愈鎰出則老稚歡呼爭前昇之鎰  
笑弗却也至是陝大饑陝父老上書願得鎰至以慰  
雲霓之望詔鎰往賑之鎰至陝民舉手加額曰今復  
何幸得見我慈父爺爺也竣事還賜玉帶金幣羊酒  
景泰中卒謚僖敏陝人廟祀之若盼蠻然

明史  
竊

徐瑄字子敬南直嘉定人正統中擢右僉都御史巡撫  
延綏嚴斥堠繕甲兵督屯種修學校虜入寇四戰皆  
捷以丁艱奪情遂上疏致仕

萬姓  
統譜

王禎邳州人右府都督正統中鎮守延綏於榆林建設

城鎮及沿邊墩臺衛堡倉場控制邊鄙

延綏鎮志

王翺字九皋鹽山人永樂十三年進士英宗初鎮守陝

西威惠著聞

名山藏

馬恭唐縣人由舉人除陝西道監察御史正統八年奉

命往陝西巡邊尋又奉命協贊延綏等處軍務九載

任滿陞都察院右僉都御史仍理前事景泰二年以

殺賊功陞右副都御史恭在邊十餘年軍政修明下



人悅服四年以老疾致仕

幾輔志

耿九疇字禹範廬氏人永樂末進士景泰三年鎮守陝西威望益著邊將請添兵臨洮諸衛下九疇議九疇言邊城士卒不少倘將帥善馭之一可當百不然徒冗食耳復言今邊民春夏出田秋冬移入塞夫民春夏田而秋冬塞何以邊將為請有民移者罪之明年轉右副都御史仍鎮其地守臣逮耀州民三百餘謂其倡妖惑坐死罪九疇曰狂民妄言實非反也悉減

死論天順初召至京特陞右都御史

名山藏

初六部卿

佐使外文移不得徑下按察使以故偃蹇不受約九

疇首奏下之

雍大記 按雍大記作天順間巡撫陝西誤

劉廣衡字克平萬安人永樂末進士景泰初歷左副都

御史鎮守陝西請遇災傷毋俟勘報即除其賦庶有

司不得借覆核陰行科率從之居官以廉節稱

明史

李裕字資德江西豐城人景泰進士授御史巡按陝西

上安邊八事

明史

項忠字蓋臣浙之嘉興人正統七年進士天順年擢陝西按察使值歲饑發廩給民不待報所活萬計丁內艱軍民詣闕借留者幾千人詔起復以大理寺卿召借者再至改右副都御史巡撫其地成化元年寇犯延綏忠禦之戰屢捷寇遁西安水多鹵宋渠久廢忠開渠三十里又鑿涇陽鄭白故渠溉田七萬頃二年土苗摩囀歡入寇忠提督軍務與彰武伯楊信禦之寇復遁三年召還掌院事

懷麓堂集

王槩字同節江西廬陵人天順中以右副都御史巡撫

陝西設法救荒全活數萬人流民歸業遷大理卿

馮志

黃紱字用章封邱人巡撫延綏嘗行部見軍婦片布遮

下體乃歎曰兵之貧至此乃驅之戰守耶於是令預

支米三月會詔毀庵寺紱使汰尼給配鰥軍人悅及

去尼有攜子女拜送道路者

賈志

楊信字文實六合人幼武勇天順元年陞都督同知鎮

延綏路明年博囉摩囉歡入塞擊退之明年又入寧

夏塞信合武平伯陳友兵來擊遂遁去四年封彰武

伯食祿千石與世券

萬姓統譜

張欽睢寧人留守右衛指揮僉事以都督僉事總兵延綏慶陽諸路有柴溝之捷賜白金綵幣進都督同知專守延綏敵復入安邊營欽連戰有功特勅佩將軍

印

延綏鎮志

馬文升字負圖河南鈞州人景泰二年進士成化四年

特拜文升巡撫陝西

世法錄

時漢中流民李鬍子倡妖

言挾衆叛潼關軍餘火竭兒蒲城民王彪鑄山行劫  
文升悉捕滅之虜牧河套文升築城堡募士授兵皆  
徙去延綏旱設法轉給芻粟條陳時事若禦戎策上  
嘉納之

名山藏

文升巡撫陝西奉公伸法亡所撓枉奸

猾弊治者悉鏟發無隱貸經畧諸邊有方而威惠行

於吏民

雍大記

朱永字景昌河南夏邑人成化初虜阿羅冠延綏永以  
平虜將軍與左都御史王越擊之擒斬首虜數多虜

馬牛羊甲械以萬計降勅即軍中予世侯留鎮三邊  
它虜復屯柳榆莊諸處出沒為患永復與戰敗之克  
獲多賜金幣良厚

名山藏

王越字世昌濬縣人景泰辛未進士擢右副都御史成  
化庚寅奉命出延綏至崖窯川擒賊四十餘人斬首  
加百遷左副都御史又於黃草梁擒賊五人斬首百  
二十進右都御史癸巳進左都御史出延綏韓家塢  
斬首二百八十餘庚子封威寧伯充總兵官鎮延綏

尋罷弘治丁巳特加太子太保總制甘肅寧夏延綏  
軍務鎮守巡撫而下悉聽節制加太保卒公久膺帥  
寄歷西北諸鎮身經百戰於邊徼險易敵情誠偽將  
士之強弱勞逸皆歷歷在胸臆每出奇取捷謀定後  
發同事者莫測所向

李東陽  
撰墓誌

成化九年越偵知敵老

弱巢紅鹽池率輕騎晝夜馳三百餘里襲擊之斬獲  
甚衆敵自據套以來無歲不深入殺掠人畜至數千  
百萬至是敵內失其孥相與悲泣渡河北去患少弭



世法錄

秦紘字世纓單人景泰中進士知府谷縣日與將官講  
兵料敵巡撫都御史徐廷璋薦陞葭州知州成化十  
九年以副都御史撫陝西秦府旗尉橫苦民捕論不  
貸秦王怒入奏紘逮下詔獄命內臣尚亨籍紘家黃  
絹一疋故衣數事而已亨太息以聞上歎嗟良久曰  
紘官不小貧至是乎立釋之賜鈔萬貫弘治十五年  
起尚書兼都御史總制三邊修邊關腹裏城堡關隘

萬四千一百九處所剷崖三千七百餘里正德初還

致仕

名山藏

鄭時舒城人景泰辛未進士

名山藏

成化中為都御史巡

撫陝西值西安諸郡大饑人食草木時奏請江南湖

襄糧及內帑銀數十萬以濟既至命布政司等官分

投給賑各盡其方饑民全活者甚衆流移安堵關陝

以寧特賜璽書獎勞尋以極論弊政謫貴州叅政起

行日長安老幼莫不號泣聲動天地遠近奔走相送

皆以手爭扛其輿盡境而還

雍大記

張敷華字公實安福人舉天順八年進士弘治八年巡撫陝西時邊民愁困逃亡田荒不治居民代賦甚苦敷華請酌五年為期有人佃種則輕其賦無者量給見在人戶暫為代納又請開鹽引茶斤並納草納米之途以廣儲積邊人賴焉終南山有妖僧張金峰聚徒立號誘男婦燒香多被迫脅敷華密令父老以拜佛為名直入生擒之既平賜勅獎諭

名山藏

許進字季升其先長安人後居靈寶成化二年進士孝

宗四年遷陝西按察使九年進右副都御史巡撫陝

西廉察守令臧否軍民利病上下肅然令潘臬巡所

部府十日州縣三日籍記行事憑而稽之先是張敷

華撫陝有名至是關中人謠曰明鏡張許重光

名山藏

進巡撫陝西力格彊禦不為勢怵馭下有權吏民無

不神明其政

雍大記

余子俊字士英青神人景泰二年進士天順初知西安

府西安故劇府兼邊事旁午子俊酬酢治辦六年為

關中冠

名山藏

子俊知西安府歲饑發廩出貸仍措畫

如數償之西安水多鹵宋龍首渠久廢或議引潯河水自丈八頭置牐入城以洩於隍積滓既久城且壞子俊因丈八之制開新渠貫城中經漢故城達於渭以免公私之患人稱為余公渠都御史項忠上其治行賜勅旌異擢右叅政督三邊軍務遷右布政使轉左使擢右副都御史巡撫綏相度邊地每徒行數

十里盡得形勢上疏請於沿邊墩臺之隙築牆建堡  
又於界至之隙因山剗削其高若城每二三里則為  
敵臺崖砦連比不絕又於中空築短牆橫一斜二如  
偃月狀以為偵敵避射之所自清水營之紫城砦至  
寧夏之花馬池東西延袤二千里凡為堡十有二壕  
牆崖砦八百有奇小墩七十邊墩十五又移定邊安  
邊二營於近地或以為棄地可惜子俊謂二營就險  
可守兼利耕牧省轉輸費是地未嘗棄也又請置榆

林衛取逋兵當勾及謫戍南土者之子孫益之凡內  
邊曠地皆墾為屯田歲獲數萬石立武學以教子弟  
之俊秀者軍中器用鉅細畢具率範鉄為之識以歲  
月蔬果之類亦隨宜教藝時加巡省自是敵過城下  
必嚙指相顧莫敢近轉左副都御史進右都御史移  
鎮陝西陳弭盜安民數事涇陽有舊堰不利灌溉每  
治輒壞子俊鑿山開道溉田千餘頃又鑿南山道直  
抵漢中以便饋餉召拜兵部尚書

懷麓  
堂集

原傑山西陽城人撫治商洛左副都御史成化間巨寇  
王彪倡亂漢南流民依聚猖獗特遣傑親履其地招  
撫流移傑安集之餘議建鄖陽撫院析商縣東為商  
南南為山陽陞商為州專設撫治道奉璽書監臨屬  
於鄖撫民始安堵比去士民請留特加尚書

商州志  
按鄖

撫兼轄興商鄖撫有  
事關興商者入陝宣

呂震字天章北直安州人癸酉舉人巡撫延綏有警震  
曰敵既深入宜堅壁待之彼無所獲必因而歸歸則



以勁兵邀其後可以得志果如其言既又築邊城寇  
不得近山陝饑榆林獨稔民流集者甚衆震恐生變  
多方活之民恃以安

賈志 按馬志  
作呂零與此異

熊繡字汝明其先豐城人占籍道州登成化二年進士  
出按陝西有布政于璠贓跡顯著棄官夜遁繡追璠  
急璠誣奏繡他事璠所親當路力主謫繡知清豐陝  
民詣闕訴冤者數百人居數年陝大祲鳳翔缺知府  
繡抵鳳翔會天旱行禱岐山之下應期雨至先時巡

陝辨一疑獄其人一聞繡至持祀像入謁弘治初累

陞右副都御史巡撫延綏

名山藏

范瑛字俊彥進士巡按陝西專理茶禁先是三邊缺馬  
廷議欲資茶以市馬瑛謂禁太嚴則利盡刀錐以病  
商太弛則利歸權勢以病國乃斟酌行之於是官茶  
行而邊馬足

賈志

李祥臨淮人以都督僉事鎮守延綏忠勇絕倫謀畧出  
衆每遇敵為士卒先累建奇功有驍將風軍中服其

勇敢以其面黑呼為黑太師

延綏鎮志

岳嵩舒城人涉獵經史襲延安衛指揮僉事以知勇累立奇功遷延綏鎮守總兵與都御史余子俊協謀修

邊有功

延綏鎮志

蕭禎字彥祥泰和人進士歷官巡撫陝西右副都御史得便宜行事陝西當凶荒之餘民初復業禎加意安輯乃內務蓄積外為備禦兵民晏然歲當錄囚得可矜疑者悉置輕典奏上因多免死是時一裨帥犯法

素有聲勢為請托者多卒論如律復以平寇功有文

綺寶鈔之賜官至尚書

賈志

李興河南嵩縣人進士弘治中巡按陝西威力風行奸

盜屏息儀賓樊某毆父諸司莫敢問興廉得之縛至

階下杖死其他鋤強戢暴皆類此

賈志時有叅將郭鏞

怙勢違法害人諸司皆畏之間有劾奏者郭即令人

劫於道并其奏章奪之興乃密奏其罪按誅於市百

姓稱快時省城諸郡王府多列通衢居民乘騎往來

貿易過者不下王即杖之興具奏言未便請自今令

民勿下上從之

雍大記

黃寶長沙人成化進士擢都御史巡撫陝西時潼關大饑城堡多圯寶肅紀律清壁壘豫餽餉遠烽燧秦地

以寧以忤劉瑾歸

湖廣通志

楊一清字應寧雲南安寧州人成化八年進士弘治四年補陝西提學副使歲試必遍八府三邊建書院以拔各學之俊秀躬督教令讀朱子白鹿洞規修禮器

樂器弦歌盈於西土所識拔士如呂柟康海李夢陽之倫稱許為大魁為聞人皆如其言當是時宗室不能奪生員之婚撫按不能撓課試之權為國朝提學之最一清留滯關中八載復以其暇講究邊事

明史稿本

傳

弘治中擢左副都御史督理陝西馬政一清條上所宜及易置馬吏輒得施行十七年北人潛伏河套兵部尚書劉大夏薦一清兼巡撫陝西經畧防禦明年設都御史總制陝西延綏甘肅寧夏軍務開府固

原命一清為之尋進右都御史正德元年冬敵復擁  
衆入套一清揚兵以待之敵渡河北遁一清謂河套  
即古朔方地唐張仁愿築三受降城以絕寇警今宜  
因險而牆之上疏議修築上可其奏劉瑾憾一清不  
先白己阻尼之其年告休家居一清多才好問有謀  
善斷邊事旁午疏占指授悉中機宜所居止時演習  
營陣曰武侯衛公未嘗廢也時告諭諸將無事時常  
如有事隄防有事時常如無事鎮靜故其總邊無所

廢失安化王寘鐸反徵拜陝西總制既行視邊堡訪求營衛部領賢否更置之罷邊軍繁重科差清革鎮守太監若總兵而下所私役軍人軍將所據草灘湖地悉令還官均其屯田之賦凡有征調軍士全隊而出無占隱者又請調延綏寧夏陝西三邊兵分道驅逐河西賊出境然後修沿邊舊守墩臺城堡以圖永久自劉瑾用邊糧浥爛罪先後守臣守臣不復積貯軍儲坐空一清多方召糴公私稍備尋召為戶部尚



書調吏部入內閣致仕世宗四年虜大入闕隴即家  
拜兵部尚書兼左都御史提督陝西三邊溫詔褒美  
比之趙充國馬援郭子儀故相行邊自一清始

名山藏

洪鍾字宣之錢塘人進士弘治六年川賊藍廷瑞鄢本  
恕等聚衆往來寇暴川陝騷動勅鍾總督川陝同巡  
撫林俊勦捕鍾涉歷險阻深入賊巢運謀設奇躬冒  
矢石前後斬獲招降以十數萬擒其渠魁二十八人

露布以聞加鍾太子太保賜玉帶

賈志

藍章字文繡山東即墨人進士以右僉都御史巡撫陝西忤逆瑾左遷通判瑾敗復撫陝時蜀鴟賊寇掠漢中章選將練兵殲其首惡餘黨悉平以功陞右副都

御史

賈志

陳壽字本仁遼東寧遠衛籍新淦人進士累官右副都御史巡撫延綏會寇分兵入掠躬親甲冑為將卒先遇寇鏖戰擒獲八十有餘未幾火節脫羅干諸部糾衆大至先以百餘騎誘戰諸將請赴之壽自出帳擁

左右數十騎據牀飲食如無事敵望見疑之遂引去

既而諸路將領擊寇皆大捷斬首數千級

賈志

壽廉名

甚著粗衣糲食如寒士巡撫延綏創火篩有功時同

事諷壽註子弟於戰籍壽曰吾子弟未諳弓馬豈可

欺罔以邀爵賞乎時論多其賢

廉平錄

正德九年以都

御史巡撫陝西下車旬日即出榜諭衆利病之原罔

不悉具仍令長安父老面陳得失量斗斛平市價禁

有司官市民物時劇盜數十剽掠良民命捕之盜賊

屏息又下令曰遭喪者不許停柩婚嫁不許索財人  
皆遵之夏大旱令各街巷開渠以通陰氣減刑殺清  
冤獄齋心誠禱天乃大雨歲大熟時勢豪中官廖堂  
煽虐歲貢毡帳縻費鉅萬民苦於科削壽連疏劾罷  
之遷南京刑部侍郎瀕行秦中老少相與爭送遮留

雍大  
記

張安大同人弘治十三年以都督僉事鎮守延綏為人

多謀畧嘗遇敵以單騎却之人服其勇

延綏  
鎮志

王廷相字子衡儀封人弘治十五年進士正德中巡按陝西憲度益振鎮守太監廖鑾煽虐關中廷相隨事

禁革鑾殊誓恨

名山藏

張璿字仲齊晉州人正德戊辰進士授御史巡按茶馬時逆瑾煽虐凡官秦地者競納交其親族璿一切拒之總兵曹雄與瑾聯姻其子入京過西安衆趨承恐後璿獨不為禮雄子銜之毀於瑾使人伺察者三卒

無所得

歲輔志

才寬字汝栗北直遷安人成化中進士初任西安知府  
後以副都御史巡撫陝西改兵部尋兼副都御史總  
制三邊好野戰不拘陣畧值火篩在套率師由興武  
營擊之斬首數十級徂勝深入忽中流矢卒於陣事

聞廕子百戶錦衣衛世襲

賈志

寬弘治中知西安府惠

民禮下其治坦濶遇事裁決如響不較小過民思慕

之

雍大記

有民失金於食店急白寬寬仰見鷹飛又有

蜘蛛墜案曰店中必有姓朱名英者得其金詰得其

人果出金以給失者至今民謠曰才寬斷朱英

西安府志

周廷徵字公賢麻城人弘治己酉舉人以教諭擢御史按陝西時安化王寘鐸反廷徵斷以先發後聞之義調榆林副總叅遊時源等分布要害仍授楊英以計為書密達仇鉞擒寘鐸何錦等械送京師而都御史楊一清太監張永兵始至張以功不由己乃追還寘鐸別自報捷又盡奪寧夏將士功給事中郝夔懼而自盡寧夏幾至再變廷徵又為撫定而白其功於朝

尋陞九江兵備副使

湖廣通志

張泰字世亨肅寧人進士歷任陝西自臬藩至巡撫俱以廉能見稱陞都察院右副都御史總制陝西三邊軍務行部過蘭疏西郭故道以興水利復開小渠以利城居者餘悉由東郭出以達於川甫彌月隍塹周滿人沾其利

賈志

張文明字應金山西陽曲人正德辛未進士丁丑按陝西發中官廖變貪橫捕其黨二十四人寘於法明年



武宗西幸上書切諫指斥權倖謂江彬有可斬十罪

大忤朝貴謫電白縣典史

賈志

王杲汶上人正德甲戌進士授監察御史巡視陝西會  
歲歉詔遣二中貴人分守蘭靖杲上言強邊饑歲民  
救死不贍若額外設官必增派困民乞取回內廷供  
掃除職庶合祖制總兵官趙文貪墨恇怯杲列文所  
犯狀文竟罷鎮累官戶部尚書

名山藏

李獻洛陽人進士巡按陝西茶馬檄漢中府不許開送

地畝樣茶以杜科擾侵漁之弊

馬志

寇天叙字子惇榆次人正德三年進士嘉靖中巡撫陝西歲大饑悉心賑濟會織造太監至御史謂關中疲敝請天叙會疏停止天叙曰遽言上未必聽遲至秋冬極言此中旱災請賑濟上必惻然則太監可召回也至秋冬以陝饑上聞請停止織造上果召回太監

名山藏

安國綏德衛人武狀元為榆林副將以功陞都督同知

鎮守有文武才號令簡易人自不犯尤善撫恤將士

延安府志

劉文字道顯慶陽衛指揮使以功鎮延綏民望旌旗所

駐如父母至及其去也扶輶涕泣充塞道路每諸將

晨謁畢即召入閣中計事人獻所長至臨陣授畫獨

其人知之故所向成功且忠信亮易上下咸親雖古

良將弗如也尋以疾卒於鎮謚武襄

延綏鎮志

李鉞字虔甫河南祥符人進士嘉靖壬午春以兵侍兼

僉都御史行邊敵入延綏設伏邀擊之斬首百餘級  
或請以捷聞曰偶勝耳惡足為功鎮巡奏捷重書嘉

之

賈志

周金字子庚武進人正德戊辰進士以僉都御史巡撫  
延綏會大同殺都御史報至金乃開門召諸將吏軍  
卒盡入環列庭下謂之曰若輩知大同殺都御史乎  
衆曰知之金曰若輩以殺之為得已耶非得已耶衆  
叩頭曰狂賊自取族耳尚何道金曰不然邊人勞苦

甚矣而又虐使之是趣之殺也假令上下素相愛若父子彼將倚以為命縱授之刃使殺焉其誰忍乎衆大歡呼叩頭退當是時以片言解上下疑阻自謂得應機之知云

馮志

王憲字惟綱山東東平人弘治中進士嘉靖五年以兵部尚書兼都察院右都御史總制陝西三邊軍務簡靜嚴肅將士凜然不敢犯時邊外部衆千餘由花馬池入犯黑水苑憲調榆林各路兵戰於細溝堡斬首

三百餘級五日四捷加太子太保廕子錦衣衛百戶

馬志

王瓊字德華山西太原人進士嘉靖七年以兵部尚書兼石副都御史總制陝西三邊軍務八年套虜入寇統兵三萬出花馬池禦之斬首六十餘級拜吏部尚

書

馬志

陳璘字邦瑞陽曲人弘治癸丑進士拜御史遷陝西苑馬少卿馬大蕃息時少師楊公一清總制三邊疏薦之

遷布政司叅政監督軍餉於是邊儲大足遷右副都御史巡撫延綏時邊警特甚璘繕城堡利器械足倉廩募兵選將寇入輒斬獲屢賜金幣時總兵柳勇參將李永定把總許國卜雲交結中貴緣為姦利邊人目為四害璘劾罷之三軍稱快會江彬導上北巡駐蹕延綏三閱月彬黨橫甚璘執大體酌時宜彬黨莫能害有成獄彬持之亦不聽邊人呼為真都御史云

苑洛集

唐龍字虞佐浙江蘭谿人進士以監察御史陞陝西按察副使提督學校時士學趨詭異乃新正學書院選士羣肄之剗其奇靡而約諸理其所登進悉為名臣嘉靖十年塞外吉囊擁衆十五萬入據河套諸達衆號四十萬亦出沒邊徼全陝戒嚴特陞兵部尚書兼副都御史總制三邊明年秋敵以精騎三千潰鎮遠關入薄平遠城乃督梁震王効等分左右哨馳至柳門夾擊破之敵浮河而遁吉囊自將十萬騎入營花



馬池乃令曰侵延綏張鳳主之寧夏固原王効劉文主之其折衝批亢則委之梁震部分已定敵從青沙峴入延安文率所部迎戰伏起乘之敵大敗於時王効敗敵於興武營梁震敗敵於乾溝二旬間凡三捷龍於三邊四鎮山川地形險阨歷歷如指諸掌為圖置座隅坐而籌之咸中機要動必有功在邊四年朝

廷倚重

賈志

賈啟湖廣黃岡人進士任陝西苑馬寺卿後以右副都

御史巡撫延綏練達治體尤通相地觀象之術

賈志

王儀字克敬北直文安人進士擢御史巡按陝西值關中饑疏請發公庾暨羨金分屬賑之漢中守素貪黷儀論其狀黜之秦府人虐奪民田場利亡筭王為之

窟儀歸田於民府中自此斂戢

賈志

劉天和字養和其先南昌人徙麻城正德三年進士授御史巡按陝西陝西鎮守中官廖堂煽虐人不堪命天和語其弟曰我往治之必得罪則製囚衣以行既

至悉縛堂舍人寘之法堂佯謝誣奏天和違旨坐逮  
捕長安吏民慟哭天和車前後枳不得發壯者至培  
挺行求堂欲捶殺之堂斂避良久益陰求刺客圖天  
和長安吏民豪者張傑王倫數十人嚙臂盟途護之  
天和所過舍為周諦其舍有無姦匿所止同卧起食  
為先嘗之至下錦衣良久降金壇丞嘉靖初陞山西  
提學副使尋改陝西一再陞以都察院右僉都御史  
督理陝軍餉楊一清薦為巡撫久之以副都御史巡

撫如故則巡行山谷中召父老問所疾苦除罷之平  
漢中賊有功以母憂去十三年以兵部侍郎拒敵三  
邊居四歲前後與敵戰二十七合得敵首數千級先  
是天和諜知敵將大入集諸將以所賜金為牛酒饗  
士出二劔陳堂皇指左劔曰將不用命者徇此右劔  
曰卒不用命者徇此及期敵果入邊帥醉不備敵登  
陴天和聞之夜馳八十里至花馬池乃引而西天和  
召醉帥立斬之與延綏將周尚文追擊敵大破之天

子即軍中加天和太子太保

名山藏

楊守禮字秉節山西蒲州人總督三邊軍務凡二歲最

首功四百餘級降數千人加太子太保

賈志

任忠山東登州人進士巡撫陝西時三邊多所徵索忠

移文令藩司酌量以義與之民受其利軍用亦足臨

民寬惠御史嚴威自守儉約卒於官以清白稱

馬志

趙廷瑞字信臣開州人進士嘉靖己亥巡撫陝西時諳

達阿布哈率衆渡河住牧套中與總督劉天和商定

方畧師大捷進兵部右侍郎秦藩輔國將軍秉樞縱

家奴責債動擊平民劾論之自是宗藩斂跡

賈志

張聽字鵠舉南直泰興人舉人以右副都御史巡撫延綏榆林孤懸塞外於九邊獨稱難守聽至即舉邊務之最急者條上十餘事上悉嘉納著為永規敵兵兩入兩敗之加右司馬仍錫金幣

延綏鎮志

張子立字原禮山東黃縣人進士以御史歷陞延綏巡撫修城堡開紅石碛以通水利民庶攸賴用兵西夏

失利遂被逮士民號泣遮道中使亦泣下延人為立

碑於學宮

馬志

周尚文陝西西安後衛指揮同知弘治正德中數出塞  
逐虜有功進指揮使歷陞征西將軍鎮守延綏與巡  
撫都御史賈起不協方坐譴奪職會虜吉囊入寇鋒  
甚銳總督尚書劉天和檄起之遂有黑水苑之戰自  
已至申凡三合軍氣乃振三鎮斬獲四百餘級陞尚

文都督同知嘉靖十九年也

名山藏

浦鉉字汝器山東登州人正德丁丑進士嘉靖二十年  
巡按陝西時楊爵以建言廷杖下詔獄鉉上疏申救  
被逮秦民護送至京被杖血肉淋漓見者不忍正視  
鉉坦然無一怨悔曰救爵乃盡按陝一事耳死何憾  
焉聞者泣下七日竟死

賈志

翁萬達字仁夫其先莆田人徙揭陽嘉靖五年進士二  
十二年陞陝西左右布政

名山藏

時藩祿不給聚訟盈

庭萬達裁處允宜人皆歡悅明年擢巡撫陝西簡將



帥去貪庸廣客兵儲峙蓄修器械固險要謹斥堠明

賞罰西北邊備屹不可犯

賈志

曹邦輔字子忠山東定陶人嘉靖壬辰進士出撫陝西  
會敵入延綏殺掠甚衆邊臣匿不以聞邦輔上疏奏  
劾大將以下七人咸論如法秦宗人有殺人獄數年  
不決一訊而服奏正憲典

賈志

曾銑字子重江都人嘉靖八年進士二十五年秋敵犯  
陝西三邊督撫一時被逮總督難其人上以屬銑遂

兼程往時敵十萬騎由寧塞突入銑曰敵糾衆來當  
攻其所必救遂命中軍參將李珍率勁卒搗其巢穴  
斬獲百十一有奇竿以示敵敵大懼遁去銑復計曰  
醜衆頻年內侵如蹈無人之境今驟聞巢穴有急倉  
皇遁去不料我師邀其前也親督將士由新安邊外  
直趨定邊擊之黎明敵見大將旗鼓相顧錯愕遂大  
潰奪獲馬器無算銑不以捷聞御史勘功始奏銑績  
且有功不伐尤邊臣所難詔以銀幣重賞之明年復

出塞征討賞銀幣有加銑感知遇益思圖報念套人  
為中國患乃上疏議復套因條為八事上令銑督同  
各邊撫鎮協心圖議務求長策嗣上方畧復條上十  
八事銑知上倚注方深晝夜講求演成行師機宜列  
為八圖次第其說上之於是領兵入套攻搗斬首二  
十七級生擒托克托呼一人餘斃矢石者甚衆獲馬牛  
駝及械器以千計敵十萬騎自寧塞入犯延安保安  
諸處銑遣叅將珍夜出塞刼其營帳斬首百餘級自

是敵聞銑來皆啗指多移營渡河矣時仇鸞為總兵  
驕恣悖逆陰洩事機銑劾其違法詔械繫鸞會嚴嵩  
父子方謀傾夏言鸞因重賂世蕃并捏危言構銑羅  
織成獄天下冤之隆慶初詔贈尚書謚襄愍

名山藏

王以旂字士招江寧人正德辛未進士累官兵部尚書  
陝西總督曾銑倡議復套被逮命以旂代之入關亟  
罷郡縣軍需停造器具又嚴盜馬之罰禁刼營之弊  
敵入波羅堡及高家堡皆督師敗之俘獲無算修完

延安等處城堡墩臺卒於固原諸鎮軍民為罷市者

數日贈少保謚襄敏

賈志

張珩字佩玉山西石州人正德間進士授監察御史巡

按陝西所至貞憲釐弊獎廉黜貪時稱名御史

萬姓統譜

珩陞右僉都御史撫延綏值歲饑躬茹疏糲一老妾

供炊歛公私所有以飽士士見珩癯咸勸加食至相

對流涕後為兵部右侍郎總督三邊軍務卒謚襄敏

延安  
鎮志

任傑西安人總兵寧夏以才望調延綏賞罰明信謀勇

兼長為敵所憚尤能制驕作懦實名將云

延綏鎮志

謝蘭字與德代州人進士陞右副都御史巡撫陝西上  
安攘方畧各有條理居常覈軍實恤民隱丁未秦隴  
大饑嘯聚山巖劍閣道阻蘭請帑賑恤擒治渠魁餘  
即解散督臣議復東勝蘭力言不可謂挑禍殃民恐  
貽西顧憂時朝議未定蘭矢以去就爭之未幾督臣  
得罪議遂寢人重其強毅有執云

賈志

賈應春字東陽正定人嘉靖癸未進士初任咸寧令善恤民隱有循良之譽歷陞陝西叅政值潼洛開採礦砂利微費鉅甚者山原無礦勒坐條鞭礦甲礦夫橫被箠楚又織造絨疋為物善蛀黃蘆土鰾陪墊困窮皆疏聞祈罷三十二年以兵部侍郎兼僉都總督三邊時敵大舉入犯廊延躬率師衝擊敵大衄甲寅延綏泥溝紅井二戰皆捷凡四年斬獲千餘級賑恤瘡痍最首功召為兵部尚書

賈志

石永字壽卿北直威縣人進士歷陞陝西按察使持憲  
明慎民以乂安陞僉都巡撫綏飭將練兵革冗役  
禁包占懲負販養勇敢謹間謀有點寇犯灰條溝前  
後斬首級獲駝馬器械甚衆

賈志

陳鳳延綏總兵嘉靖三十六年三月虜寇延綏鳳死之

賜贈廕祠死所

名山藏

康朗字用晦惠安人嘉靖乙未進士晉僉都御史開府  
鄖陽適漢中降徊激變屢師無功朗持檄諭之令東



身來歸待以不死  
緬羅拜加額曰  
鄖院仁而有信必

不我欺遂解去

福建通志

劉淮以都督僉事鎮守榆林淮忠勇有謀廉介自守讀

書為文時稱儒將

賈志

程軌字信甫山東臨清人進士監察御史擢陝西副使

歷布政進右副都御史四十年夏總督防秋令總兵

曹世忠中軍金輅千總王節把總陳源殿敵襲陳源

源戰死輅等弃弗援敵遂東掠安邊定邊西至螺山

全陝大震軌論罷壬戌春以原官為三邊總督自陳源戰後士氣委靡公私匱竭軌以廉約率勵將士為文祭死事者哭而賑恤之軍復振敵入塞軌遣總兵趙奇吳鼎等迎擊之十月復薄清水營軌命總兵許經戰却之前後斬首八百餘級捷上賚白金文綺趙奇等皆簪錦衣巡撫孫慎廕官生軌獨未陞廕以嚴嵩阻也

賈志

喻時光州人進士以副都御史為陝西總督吉囊等入

寇時遣總兵趙岢率兵迎擊斬首大捷獲馬駝牛羊數千後復薄清水營時遣兵戰卻之邊功甚著陞兵

部右侍郎

賈志

戴才字子需滄州人嘉靖甲辰進士晉副都御史撫陝西尋陞總督才凡三蒞陝熟其利弊舉劾咸當其人會套衆歛關乞貢市報可而吉能者諳達支屬也援例以請下才議才言敵東西各為雄長通貢宜隨套衆若互市則甘肅開市已久不宜令混入以滋禍階

延寧二鎮頗為近敵亦不宜因市起釁互市第可行之宣大不可槩陝西也卒主延寧二市且疏改延綏市於紅山閘門之外自才蒞事無一敢譁於市者

賈志

王遴字繼津霸州人進士嘉靖四十五年以右僉都御史巡撫延綏賦性鯁介釐奸剔蠹一時饕餮將吏凜凜改絃會東路兵燹後因之歲惡民多流徙遴造舟糴晉粟食之始得存活又念中路清平孤險請增將樹兵衛之後敵果萬騎薄城下以有備去又築中河

至保寧大邊及鎮郭邏城仍請增府同知一員專職

城堡皆永利實政

賈志

郭琥字宗器永昌人以功晉延綏總兵官佩鎮西將軍印大司馬王遴撫延綏氣槩高一時琥持體不少遜遴初銜之已察琥忠勇廉幹遂親厚琥勁骨猿臂善騎射不知書而以意作檄頗中肯綮持身潔與人恭

在軍鎮肅軍民不擾

賈志

楊鈐字希尹邢臺人嘉靖己未進士巡按陝西戍卒軍

需歲給發吏多乾沒為奸凡遇稽覈則詭文避罪鈐

庶知其弊凡諸姦欺者皆按論如法邊儲一清

賈志

却光先山西長治人進士任延綏右副都御史老成簡

重文武率嚴憚之綢繆邊事不遺餘力築雄石硤以

東大邊三十里保寧至波羅大川口五十二里有金

城之固以功陞大司馬

延綏鎮志

張守中字大石山西聞喜人舉人以右僉都御史巡撫

延綏甫下車即抑豪橫懲貪墨肅紀綱戒淫侈惟修

實政不事鋪張若鎮城暨諸邊堡城垣衙宇學宮倉  
廩皆躬蒞其所規畫指示殫力經營時軍民禔福奸

宄斂跡

賈志

沈楠字汝林仁和人進士巡按陝西下車問民疾苦延  
見藩臬諮吏治得失及部中豪不法興廉去墨威暴  
澤枯孳孳弗逮又閔延綏兵馬入衛疲勞分辦花馬  
池鹽課利害方欲條上以疾卒櫬發白衣冠送者如

堵

賈志

張瀚字子文杭州人進士擢潼關治兵使套人深入烽  
火達於白水瀚即移兵駐縣敵不敢入轉陝左右轄  
擢巡撫都御史終南饑民屯聚欲亂瀚慰撫之輒投  
戈散去後謝歸未幾起原官再撫關中神宗即位召

入為吏部尚書

賈志

羅鳳翔蒲州人萬厯初任陝西巡撫體恤民隱蘇息商  
困止入衛兵馬以省繹騷修繕城池以為不虞之備  
為政先於自治以風其下故不嚴而威

賈志



王世揚字孝甫廣平人進士以御史按視茶馬值歲侵  
蠲贖鍰二千金復疏請茶課二千金賑之甘肅故以  
蕃為蔽蕃與狄關世揚卵翼約束烽燧頓消歲增駛  
騾四百七十騎省樁朋金五千有奇遷理卿仍兼御  
史閱視延綏世揚故諳九塞詭譎調咸為次第閱實馬  
如初市他所設施皆百年至計最後條十事上嘉納  
之下所司覆著為令

賈志

王汝梅安肅人進士萬曆九年任延綏右副都御史時

值大饑邊餉告匱汝梅竭力救荒蠲租請賑生活者  
數萬人凡作養士氣培植民生區畫殆盡西陲以安

賈志

梅友松四川內江人歷陞延綏巡撫嚴守備勤訓練諸  
番懾服晉都御史兼兵侍總督三邊條上十二事皆  
報聞無何歸里當世以邊才論薦者首先屈指云

四川

通志

賈侍問字學叔北直威縣人隆慶戊辰進士初知咸寧

縣案牘山積迎刃而解嘗清并蕪之稅五十餘頃治

聲流聞擢給事中

賈志

待問歷陞太子少保右都御史

巡撫陝西值神宗銳意權採中貴挾權橫恣待問不  
避怨嫌力為節制民賴以安在陝七年外讜強敵內  
保遺黎以勞瘁卒於官賜祭葬贈太子太保兵部尚

書

畿輔志

姚三讓字崇謙永年人進士以御史出按陝西按部務  
大體不為瑣屑所至不寒而栗即諸王國人屏氣相

下事竣移疾歸

賈志

姚繼可字光父襄城人進士以副使兵備定邊命郡邑  
衛所修築簡練警塵遂息尋遷左布政使時關中災  
疹頻仍糧餉徵發無虛日繼可拮据應辦軍民兩利  
改撫陝西屢著碩畫

賈志

麻貴大同人萬厯中延綏總兵簡練軍士信賞必罰用  
降卒為鄉導善伺敵間而乘之嘗卧病聞警輒起夜  
出師俘馘甚衆已又窮追之殲其渠魁又分軍為九

自以大軍獨當一面大捷

延安府志

顧其志字太冲長洲人隆慶辛未進士歷陝西叅政尋

轉陝西左布政使礦稅二璫肆橫其志痛加裁抑歷

官右副都御史總督三邊清郵傳撤關梁禁告訐翦

亡命奏止礦稅織造陰發二璫之惡上意動撤之

江南

通志萬曆三十四年稅監梁永樹黨布虐其志捕惡黨

置之法

紀事本末

劉葵字効忠順天通州人進士任延綏右僉都御史剛

明嚴斷人不敢犯簿書悉自裁之所用皆公市行戶不擾而懷奸挾詐之徒無所逞一時豪橫斂跡地方

肅然

賈志

余懋衡字持國婺源人萬厯壬辰進士為御史巡按陝西劾稅璫梁永永寤賄庖人以蠱進懋衡瀕死夢神示方得解上為撤永並罷天下礦稅閱視固延兩鎮條上十事上嘉納為令

江南通志

王見賓山東濟南人進士任延綏巡撫沉毅多奇畧每

籌畫邊務能集思廣益知人善任故動有成績

延安府志

孫維城山東丘縣人進士累官僉都御史萬厯辛丑巡撫延綏時秋霜害稼地方艱食維城憂形於色多方賑貸全活甚衆總兵時以苞苴入每裁抑之士以事至輒降色加禮教以為善邊人洗心滌慮稱所未有卒於官聞者莫不墮淚

賈志

涂宗濬江西南昌人進士巡撫延綏刊聖學源流修學宮創書院建文塔置學田增廩餼改武庫周悉備至

又葺堠臺創鎮志俱稱不朽

延綏鎮志

黃嘉善山東即墨人進士自寧夏巡撫總制陝西三邊軍務矢志安攘甘延兩鎮累報奇捷朝廷稱有社稷功更修廟學置學田以養士人才蔚興詔進兵部尚

書

賈志

劉敏寬山西安邑人進士以右僉都御史巡撫延綏簡書總制陝西三邊軍務所至簡兵蒐乘備儲繕繕城堡而料敵又先見如神自撫至督共計捷三十有奇



為人慷慨有大畧與諸將吏推心置腹更喜與諸生

譚道論文愉人感德立生祠以祀之

賈志

馬從聘字起莘靈壽人萬厯己丑進士延綏巡撫閣部

數推上俱不當上旨因疏舉從聘詔可時西鄙屢有

警從聘核兵簡餉繕器增堠率同鎮臣杜松獲大捷

者三上手詔嘉與勅本兵察叙丙辰以病請章五上

乃許歸

畿輔志

金忠士南直休寧人進士任榆林兵備有軍功特簡僉

都御史巡撫延綏聚構積芻陰備不虞敵入套忠士  
密與大將軍杜文煥計議率精兵破之邊功甚著以  
積勞卒於任榆人立祠祀之

賈志

龍遇奇字紫海江西永寧人萬歷進士巡按陝西時秦  
中多冤獄繫於理者數十年不得釋遇奇閱故牘多  
所平反宥無辜數百人著三秦慎讞恤疑錄

江西志

高弘圖山東膠州人進士巡按陝西時秦藩校尉金鉤  
潘福肆惡虐民弘圖廉得其狀治以重法藩校斂跡

秦人樂業

賈志

范復粹山東黃縣人進士巡按陝西御史為政端廉洞達民隱全秦頌其神明方莅任值大旱一禱獲雨民

即稱焉

賈志

王承恩號錫宇西寧人崇禎二年以臨洮總兵勤王收復四城晉左都督調任延鎮四年七月賊首上天龍馬老虎獨行狼掠鄜州列三營於太平原承恩擊破之上天龍等以二千人降賊滿天星等自合水叛去

攻中部承恩帥師往討斬獲賊首萬餘級生擒二千  
餘衆捷聞加太子太保十一月賊首譚雄陷安塞不  
沾泥張存孟等陷安定承恩克安塞斬五百餘級即  
進剿安定賊潛走綏德混天猴等陷甘泉殺知縣郭  
永圖河西兵備副使張允登戰死洪承疇遣承恩分  
剿之五年十月承恩敗安塞遺賊於西川吳堡賊首  
喬六自斬其魁以降餘遁走延綏稍寧尋以華州兵

潰謫去

延綏  
鎮志

陳奇瑜山西保德人進士崇禎五年以陝西左布政推  
巡撫延綏清介有守在藩司時有羨金二萬時延鎮  
大饑死者枕藉奇瑜盡以賑濟全活無筭六年十二  
月賊盡入山西兼走河南延綏賊首鑽天嘯開山斧  
獨據永寧關阻險數年不下奇瑜假總督檄發兵七  
千抵延川潛師疾走賊不虞大兵至倉皇奔潰擊賊  
首一座城并斬之進兵部右侍郎總督陝西山西河  
南湖廣四川軍務

延綏鎮志  
總制時聽賊

按畿輔志云奇瑜為  
就撫至於失機誠為

非計但據延綏鎮志載其巡撫延綏賑饑破賊功在斯民未可畧也故並志之以見功罪不相掩之義

傅永淳字熙宇靈壽人天啟進士擢侍御史按秦巡撫都御史李喬者懦不知兵徵諸將不如約永淳列狀劾之按部郃陽賊數萬薄城下永淳率士民堅守七十餘日賊少懈乃密檄邊兵五千人夜入賊旦復來攻永淳開門令城中兵突出外伏亦起來擊轉戰三日大破之斬首千餘級奪回婦女資畜無筭都御史陳奇瑜賜劍督兵三十萬專辦賊奇瑜入關賊西走

棧道馳漢中會霖雨浹月永淳謂竒瑜曰賊鎧漬械  
敝進勦之功正在今日竒瑜不能用賊更陰賄竒瑜  
左右求撫竒瑜許之永淳上章力主剿兵部卒從撫  
議賊從容出棧道與官兵歡飲數日忽鼓噪而西破  
鳳隴汧陽諸郡縣竟不可制永淳痛哭拜疏劾其溺  
職玩寇疏入上怒詔逮竒瑜擢永淳太僕少卿

畿輔志

練國事字君豫永城人萬歷丙辰進士巡撫陝西寇大  
起國事入關料精銳汰冗濫躬歷行陳者五年晉寇

逸入秦總督陳奇瑜主招撫國事馳書論不宜解嚴  
狀賊果乘懈猖獗兵部更以其罪坐國事謫戍廣西

河南  
通志

張伯鯨江南楊州人進士任延綏餉儲廉介自矢遇旱  
虔禱歲饑捐賑活人甚衆延人叩閭保陞榆林道又  
陞延撫歷官二十年視民如子延綏畫像祀之

賈志

柯元伯龍巖人崇禎辛未進士擢御史巡按陝西茶馬  
時秦中流寇蹂躪商人咸失資引元伯至設法流通



軍民賴之

福建通志

汪喬年號歲星浙江遂安人由進士督學三秦校士必焚香告天誓無所私故所拔俱一時寒士又負才武膂力絕人念四方多故常休沐里居輒馳騎習弓刀擊刺寢處風露中不自暇逸十四年四月奉命撫秦謀報自成將叩關西入急跨馬傳箭疾驅至商洛部署粗定總督傅宗龍訃至仰天歎曰傅公死討賊無人矣繼聞總督之命方簡兵儲糧未集而兵部催出人矣

關檄踵至曰兵疲糧乏而當方張之寇我自知以肉  
餒猛虎然不容不出以持中原心師進遂敗死之勅  
建忠烈祠櫬歸途中數遇賊從吏謂曰此死節清官  
陝西總督都御史汪公枢也若輩欲尸祝之請留不  
然橐中無物可取也皆愕然羅拜去

續表  
忠記

金毓峒北直完縣人崇禎甲戌進士以御史出按陝西  
時孫傳庭治兵關中吏民苦征繕日夜望其出關稍  
得蘇息而天子亦屢督之毓峒獨謂兵未夙練未可

輕戰抗疏爭之不納師果盡覆十六年冬期滿得代

甫出境而賊入關

續表  
忠記

孫傳庭字白谷代州振武衛人進士魁岸多大畧秦撫  
甘學濶不能討賊乃推邊才用傳庭崇禎九年三月  
受代傳庭泣秦嚴徵發期會一從軍興法又清理屯  
地籍壯丁為軍量徵屯課以濟軍需賊渠闖王高迎  
祥最強柘養坤最衆傳庭設方畧陣擒迎祥於藍屋  
之黑水峪檻車獻俘京師帝大悅為告廟行賞養坤

降而復叛亦追斬之諸賊望風瓦解威名大起洪承  
疇以秦督兼勦務會李自成與洪督相持於邊過天  
星等數十部又犯涇陽三原傳庭擊之楊家嶺黃龍  
山大破之賊引而北犯延安延安地瘠而荒不能留  
諒賊反走之路輕重布伏賊折而南傳庭大張旗幟  
鳴鼓角以邀之賊一日夜奔三百里至職田庄遇伏  
而敗復走寶雞取棧道再中伏大敗折而走隴州關  
山道又為伏兵所挫盡解甲降無一遁者又逐賊邠

寧間身自陷陣獲其渠魁軍聲益振豫賊馬進忠馬  
光玉驅宛雒之衆箕張而西傅庭擊之賊還走又設  
伏於潼關原曹變蛟逐賊入伏自成盡亡其卒以十  
八騎潰圍遁秦中少安十一月京師有警召傅庭入  
援加兵部侍郎賜劍楊嗣昌中之遂逮問下獄長繫  
三年賊益橫嗣昌自縊公論大白十五年三月自成  
再圍開封帝出傳庭於獄命將禁旅往援河南秦帥  
賀人龍心不為國家用總督傅宗龍汪喬年皆為所

陷帝改傳庭督關中而密授計斬人龍人龍部卒萬餘無敢譁者朝議趣傳庭星馳救汴傳庭請稍展其期帝不聽不得已出師十月汴城陷援師亦敗傳庭上書自劾詔令圖功自贖傳庭歸陝力主固守潼關扼京師上游且以我軍新集不欲速戰而關中歲饑餉告匱士大夫不樂其在秦咸上書迎帝意催戰帝亦望其亟奏蕩平晉尚書鑄督師七省印授之催戰益急傳庭頓足歎曰吾固知戰未必捷然大丈夫豈

能再對獄吏乎疏報師期識者危之十六年八月出師潼關九月兵敗賊乘勝破潼關華陰追及於渭南十月初六日傳庭與監軍副使喬遷高躍馬大呼而歿於陣從騎俱散傳庭屍竟不可得

續表  
忠記

馮師孔字若魯原武人初授刑曹恤刑陝西釋疑獄一百八十餘人咸頌其平崇禎十五年四月詔舉邊才兵部侍郎張鏡心以師孔應詔吏部嚴核者再吏部亦亟稱其才凡六領兵脩威在衝邊兵益練名益起

遂擢僉都御史代蔡官治巡撫陝西時總督孫傳庭  
方奉新命大舉討賊師孔助調兵食拮据勞瘁傳庭  
出關盡以西安之卒行師孔方募兵修脩而傳庭為  
大雨所詘敗報至賊於十六年十月初七日長驅入  
潼關不數日直抵西安師孔厲將士率吏民分城拒  
守而自守東門天寒勸秦王給兵士人一棉衣勿聽  
城守者傳殮皆結為冰不可食半多僵卧城頭勢已  
岌岌王叅將內應城遂陷秦王被執師孔投井死時



十月十三日也

續表  
忠記

李昌齡號玉川鎮番人任延綏總兵數有戰功以抗直不合於時軍政落職因家焉崇禎十六年闖賊直趨潼關陷西安府遣僞將李過劉芳亮北畧榆林城中洶洶時昌齡在旅舍或告之趣亡昌齡曰我叨列大臣莫非國土去將焉之果此城不守當與之存亡耳未幾李過等至綏德遣賊將黃色俊來說降於是榆林道副使都任督餉戶部王家祿中協副總兵惠顯

與各營諸將集議死守共推昌齡宿將知兵署領鎮  
事昌齡乃瀝血誓師分汛以守復出統銳衆以戰頗多  
斬獲賊甚恨之督攻愈急城陷士女皆登屋巷戰刀  
楯之聲不絕至諸將之在圍中或被傷或自盡或為  
賊縛無一人降者昌齡檻送西安罵賊不屈磔於市

延安  
府志

按節鎮當國家重寄非宏才碩望莫膺斯任其賢  
者各具專傳次則勲庸未著亦詳其姓氏而爵里

亦附見焉明三邊總制柴昇內鄉人李士翱山東

人沈應時河南人徐元泰宣城人鄭洛安肅人李

汶任邱人姚鎮慈谿人

舊志作餘姚人誤

王崇古蒲州人

田樂任丘人巡撫陝西楊璿無錫人徐舟永豐人

王一言內江人宋有文資縣人王珣永平衛人丘

鼎貴溪人鮑象賢歙縣人唐時英曲靖人曹金祥

符人李應選江夏人巡撫延綏徐廷璋羅山人陸

矩阜城人王銳遷安人盧祥東莞人劉忠濮州人

金獻民綿州人張宏正定人萬潮進賢人賈仁元  
萬泉人陳其學登州人楊守謙長沙人鄭汝璧縉  
雲人巡按陝西御史陳衡永新人張鑑建昌人馮  
誠浮梁人蔡愈清保昌人劉城鄱陽人方佑桐城  
人張玉吳橋人楊縉聞喜人李瀚沁水人曹珪黃  
岡人喻茂堅豐城人卞偉宜賓人朱觀崑山人姚  
一元長興人陳文煥臨川人盛汝謙桐城人方新  
青陽人陳薦祁陽人畢懋康歙縣人錢守廉信陽

人王倓商城人巡視茶馬御史楊以誠宜春人張  
銓沁水人延綏總兵張傑順天人陳輝延安人吳  
江綏德衛人西陲保障諸人殆不無少補云

### 本朝

孟喬芳滿洲鑲紅旗人順治二年以兵部侍郎總督  
川陝是年賀珍作亂鳳翔平涼所屬並遭殘害省  
城被圍喬芳發卒大敗之追至漢中復敗之漢南  
悉定三年李鵠子反同州屬邑盡陷會

王師西下喬芳合兵蕩寇左輔以寧五年米狃子破  
河州蘭州臨洮窺鞏昌諸部飛騎告警喬芳寂無  
調發謂使者曰無恐汝歸時度吾軍當破賊矣使  
者謝去比至則援師四集寇焰俱消六年王永強  
與府谷賊高有才連兵以叛同華震動喬芳飛檄  
趣吳三桂濟師彙勦復延安下府谷永強有才以  
次撲滅喬芳疊經寇禍旌麾所指每寇期告捷  
國初秦地甫平民心未靖其保護安集實喬芳力

也晉本部尚書太子太保十二年卒於官祭葬踰  
常典謚忠毅雍正十年祀賢良祠

王正志字灝夫靜海人順治二年以右僉都御史巡  
撫延綏時邊塞初附正志多方綏輯兵民又安五  
年冬大同姜瓖變起瓖故榆林人也謚言謂姜兵  
且至六年正月正志檄調延安叅將王永彊同總  
兵沈文華駐兵防河永彊夙父事正志故正志任  
之然恃勇素跋扈二月永彊勾神木賊高有才襲

榆林因率兵夜至城下聲言姜逆分兵過河將歸  
守延安遂入駐凱歌樓及曙正志議城守永彊偵  
知有才兵至即倡衆開城延賊正志聞變知不免急  
走準提寺死之時戶部郎中朱予昇以督餉至榆  
林亦死之

沈文華奉天義州人順治三年以都督同知充延綏  
總兵官六年正月文華因姜瓖之變自鎮城移兵  
駐黃河防賊西犯檄延安叅將王永彊以兵協防



清水營及黃甫川諸路會神木賊田秉德張秀首  
亂推廢將高有才為主大肆焚劫二月永彊忽撤  
兵走榆林文華知永彊有異志率兵追襲至神木  
陷有才伏中為所得死之

石維崑字輿瞻清苑人順治丙戌進士授庶常轉御  
史五年巡按陝西值河西猗叛勢甚熾維崑叱馭  
西巡選兵策將亂遂克定未幾以累悞左遷尋復  
職十六年再按陝西所至却供帳斥豪猾恤貧賑

孤網紀整肅積勞嘔血而卒

馬之先字勉吾奉天鑲藍旗人順治九年以右副都御史巡撫陝西治尚清淨吏習民安十一年總督宣大十二年晉兵部尚書總制三邊之先素諳邊事興屯訓士斟酌盡善性勤敏雖軍需旁午咄嗟立辦在任二年積勞成疾卒秦民為之罷市事

聞賜祭葬

金礪奉天鑲紅旗人順治十一年以兵部侍郎總督

陝西豁達有遠識時值軍務空惚文移絡繹礪一  
覽洞悉摘發隱伏動合機宜且節制有體嚴紀律  
明賞罰人人畏威懷德未幾請告歸卒

### 賜祭葬

張璿字伯珩陽城人崇禎癸未進士順治十七年以  
右副都御史巡撫陝西會制府李國英以才望

特膺簡命入川辦寇璿獨肩全陝重任裁決悉中機宜  
先是臨鞏鎮移駐西寧仍自臨鞏給餉璿請以西

寧額賦給之不足乃令臨鞏協濟又請以提標移駐臨鞏邊防益固時西南方宿重兵部議畝加一分名曰練餉璿謂緣邊賦額不以畝計若畝加一分則外賦浮於正供不可即抗章請免奸民朱君應偽稱明裔潛勾諸番又王鳳貴等挾妖術陰結竹谿山寇璿授計將佐悉擒之舊例寧甘延三撫臣只握兵柄不與民事璿力陳不便割所隸臨鞏慶延平五郡一切刑名錢穀俾得一體專決其能

持政體多此類

白如梅滿洲鑲白旗人康熙元年以兵部尚書出督  
陝西時鄖寇猖獗秦豫三方會剿興安與鄖接壤  
轉輸不給如梅請軍至楚地即需楚餉秦運以白  
土關為界立

報可又請罷臨鞏練餉捐黃甫烟稅咸得

允行邊牆袤五千餘里廢自明季如梅密陳事宜邊防  
克固更念吏治民生相為表裏因詳列擾民十害

飭行所屬并勒石垂示

賈漢復字膠侯滿洲籍曲沃人歷官河南巡撫康熙  
元年調撫陝西秦隴當兵燹之餘漢復一意綏輯  
嚴保甲清郵置免逋欠急捐賑民困以蘇又以暇  
進父老詢疾苦如白土關止運宜川縣緩征清邠  
州賦額重定延安府地畝制前後飛章入告皆

報可三年秋巡視漢南覩雲棧崎嶇乃自煎茶坪抵雞  
頭關剔險披隘盡成坦途秦中夙號都會自明季

荒殘之後文獻蔑如漢復以其暇日延致名流搜羅掌故閱五載而通志告成會纂修

大清一統志部議飭行直省各修通志以秦豫二志為式先是漢復撫河南成河南通志二志皆漢復所手定故士論尤歸之在任八年以

內召去

莫洛滿洲正紅旗人康熙六年總督陝西九年以陞任去十三年吳逆叛命西陲震動

聖祖命洛以閣部經畧關中洛至即招募義勇收攬豪俊  
以期大舉秋八月出師陝西提督王輔臣為前行  
洛率大軍以繼其後時兵多新集又師期過迫儲  
侍未周方入棧霖雨彌旬山徑阻絕日行不數里  
將士有逸去者洛開誠撫諭稍復引還十二月抵  
寧羗有逃兵自盤龍山來者備言乏糧狀軍心洶  
洶入白洛洛反覆諭之始定先是提標兵素驕悖  
洛恒趣督之至是遂羣起而囂輔臣不能制於是



廻戈向洛洛一軍星散兵至洛神色自若曰吾受國恩不能効尺寸以報死吾分也遂端坐而及於難事聞詔治祭奠如禮

哈占滿洲正藍旗人性沉毅有文武才康熙十二年以工部侍郎出督川陝值吳逆倡亂黔蜀雲擾占從容指畫三秦晏然十八年夏五月賊將王屏藩據漢中冬十月大兵三路進取漢興奮威將軍王進寶出寶雞振武將軍鄂克濟哈勇畧將軍趙良

棟出畧陽占與撫遠大將軍圖海出大泥峪遂進駐舊縣關以待濟師會謀報進寶兵已克武關占謀於大將軍曰武關已拔中路兵可直搗漢中漢中若下興安諸處可傳檄而定也何老師為哉遂鼓行至鎮安復進攻兩河關克之長驅搗興安抵漢中與進寶兵會明年大兵入蜀奉

詔駐漢中理餉飛芻輓粟軍得無乏未幾賊帥胡國柱等犯瀘州蜀中大震占分兵倍道赴援又手書馳

諭將士人懷固志屢戰克捷賊乃遁二十年復率  
兵由永寧進薄滇南次交水聞滇捷班師駐成都  
二十一年歸西安初占奏立火器營於西安選屯  
軍二千人練習其後摧鋒陷銳所向有功因仍其  
制而以專官領之又二年入為兵部尚書至是歷  
十二年矣

國朝秦督之久惟占與孟喬芳二人

圖海滿洲正黃旗人康熙十五年王輔臣叛據平涼

以海為撫遠大將軍討之海勦撫並用平涼以寧  
十八年賊將王屏藩據漢中陳君極引兵出寶雞  
時海駐兵鳳翔賊乘夜攻西山堡甚急海星馳赴  
之圍乃解仍分兵守紅崖堡以張軍勢賊列陣山  
岡誘戰我師分道出敵各大捷已而賊復來海伏  
兵邀賊歸路再戰再破之自是賊不能越寶雞而

東冬十月

王師進取興漢海從大泥峪進薄鎮安賊方據兩河

關關去鎮安百里時河橋未就有司無以應海即  
軍中選精兵禦敵餘悉令伐木山中一夕浮梁成  
我師畢渡會風雪大作燕嶺龍川一帶賊恃險不  
設守海大喜曰此李愬入蔡州時也立遣奇兵從  
間道走兩河關後乘高急攻下之轉戰而前與奮  
威將軍王進寶兵會漢中全秦自此無警言海性沉  
毅未嘗為兵家言而運籌決勝雅與古合又善撫  
士卒同甘苦以是人樂為用所向多成功師還晉中

和殿大學士兼吏部尚書卒贈少保兼太子太傅  
謚文襄尋追封一等公雍正二年奉

勅配享

太廟九年加封忠達公十年入祀賢良祠

費雅達康熙十八年五月授漢中鎮總兵先是十四  
年八月漢中失守官兵退屯南山之麓雅達至約  
束軍士沿山村堡民不知兵十一月大兵復漢中  
雅達帥師征進居民爭挈壺漿囊糗糒以送之

博濟滿洲鑲白旗人康熙三十一年任西安將軍西  
安地居省會百貨駢集四門故有抽物陋規濟嚴  
禁旗兵毫無染指四十二年

特簡川陝總督濟為政不事瑣屑官吏肅清兵民安堵  
尤加意學校以振興斯文為已任民間子弟可教  
者盡廩給之俾入書院肄業極一時人文之盛

席爾達滿洲鑲紅旗人康熙三十八年以兵部尚書  
署理川陝總督時自督撫以下例有州縣規禮吏

胥因緣為奸科斂里民爾達蒞任即嚴禁州縣徵收重耗又以上司不受餽遺則無瞻顧之心而里民之私派始可盡除特疏請於

朝勒石各衙門以垂永禁又河西歲歉爾達單騎驗視發粟賑濟全活頗眾四十年以吏部尚書

內召離任

覺羅華顯滿洲正紅旗人康熙三十九年以內閣學士出為陝西巡撫四十年總督川陝秦蜀地廣山



深邊防遼遠華顯修築營堡選習士馬軍政一新  
秦民夙苦私派華顯嚴飭禁革民得息肩州縣徵  
收令里甲封投正項羨餘一無所問性清約屏絕  
餽遺下至日用薪蔬概不煩民四十三年卒官次  
年奉

旨祀名宦祠謚文襄

殷秦滿洲鑲紅旗人以軍功擢甘肅提督康熙四十  
八年調總督川陝蒞事不尚虛文令行禁止人莫

敢犯四十九年大計兩省官吏苞苴不行舉劾悉  
當五十年以公事入蜀道經鳳漢所至問民疾苦  
父老以雞酒相餉泰輒倚車慰勞并集衆勸諭官  
民絮語無間一時谿山村落中若不知其為制府  
也卒

賜祭葬諡清端

陝西通志卷五十一